

光緒重修天津府志

重修天津府志卷三十九

傳一

宦績一

歷朝

目錄  
龔遂 漢

彭宏

郭伋

朱浮

鄧壽

李恂

左雄

馮煥

樊準

蘇章

周舉

第五種

朱穆

范滂

蔡衍

羊陟

賈琮

皇甫嵩

劉虞

崔琰

張堪

范遷

廉范

周紆

張顯

李膺

王暢

楊璇

陸康

崔林

三國

張華

晉

唐彬

山濤

衛瓘

魏舒

劉宏

丁紹

段匹磾

劉琨

邵續

何尚之

長孫嵩

北魏

韓均

陸俟

源賀

元雲

李平

李韶

裴延儻

元孚

崔休

畢聞慰

綦儁

陸子彰

堯雄

封隆之

元孝友

高洙

邢晏

元拔干

宋稚

裴彥先

庾導

李繪

高叡

北齊

王士良

鄭述祖

于翼

北周

陰壽

趙熙

隋

張熙

竇宗

郭絢

裴懷古

唐

姜師度

薛季昶

狄仁傑

宋璟

韓琬

裴寬

張守珪

苗晉卿

李光弼

張孝忠

李寰

溫造

烏重胤

殷侑

杜中立

渾侃

薛大鼎

李乾祐

解琬

郭英傑

裴觀

田廷玠

子宏正

穆甯

符存審

五代

趙德鈞

王景

薛居正

劉沓

王嗣宗

宋

田錫

宋準

何承矩

裴莊

陳恕

李斌

盧琰

寇瑛

李仕衡

陳貫

向敏中

張士遜

劉承宗

張綸

李繹

呂公弼

包拯

劉元瑜

王彬

楊偕

杜衍

田京

韓絳

趙忱

張問

王沿

子鼎

歐陽修

張希一

弟利一

唐介

子義問

李參

張燾

劉庠

呂大忠

韓贄

滕元發

任諒

唐恪

張美

喬惟岳

葛懷敏

靳懷德

趙鎔

柴禹錫

張煦

慕容德豐

安守忠

陳興

李允則

李昭遠

李壽朋

孟元

李復圭

曾鞏

高賦

李南公

何籩

靳宗說

孔遶

大臭金

梁肅

張大節

任天寵

高錫

完顏佐

趙重福

張甫

職官外

訛里也

皮肅

高源

元

謝讓

成遵

德呼威蘇

崔敬

職官外

王思誠

王君美

忽辛

馬克昭

宋納

王欽禮

董搏霄

職官外

汪應蛟

明

畢自巖

李邦華

李繼貞

陳泰

楊璿

張營

侶鍾

張鼎

史琳

高銓

張縉

王沂

王璟

張瀆

孟鳳

林廷玉

伍符

卷之三十一 官續

劉麟

林廷楫

王應鵬

許宗魯

周金

劉夔

吳瀚

蘇祐

楊守謙

吳嶽

宋纁

孫丕揚

張鹵

辛自修

陰武卿

賈三近

劉東星

孫璋

徐標

陳政

左光斗

于謙

涂禎

于鏊

徐讚

裴紳

趙鏗

蘇士潤

馮從吾

解延年

張鍵

李琪

童瑞

徐問

楊璉

東漢

何繼高

劉福

施榮

陳天祥

史鑑

張羽

胡文璧

郜相

呂盛

錢如京

牛天麟

葛本

王璣

吳嘉會

劉廷臣

毛愷

賴庭檜

查志隆

彭國光

梁雲龍

邱民仰

崔衍

李濬

許侃

廖謨

顧佐

李讓

段釗

喻茂堅

丁以忠

顏孕紹

常在

盧觀象

張星

夏言

職官外

王彬

王宏毅

呂和

蘇峻

一劉素

周忠

錢貫

劉繹

李遠

王緝顯

孟楠

錢珍

張文煥

余勁

李完

張綸

張頌

馮琚

尙樸

劉弁

劉照

武雷

郭天錫

陳範

戴大槐

吳應陽

董養聰

王良相

胡啟睿

商賓

隨正脈

樊効才

江英

李伯震

劉謹

上官儀

賈忠

武英

馬魁

張奇

邵紀

胡政

張興行

盧廷選

王堯封

王三錫

李騰蛟

蔡秉元

朱萬年

張通

張麟

陳毅

于珥

鄧翰

李珙

朱方

黃持衡

李筵

馮鞏

龐沆

王允中

劉廷臣

李正華

左之禎

魏良佐

佟卜年

王所須

藍再茂

簡仁瑞

陳虞裔

滕善國

高尙仁

吳文靖

王憲

張瑄

林惟盛

武震

張綸

時尙儒

岳孝先

李萼

劉子誠

陳誌

李有嘉

盧綸

辭廷熙

耿惟直

祁鳳

王邦直

楊思義

趙亮

張彪

唐瓚

宋漢

文森

杜玠

李宋

劉應兆

林之盛

葉時敦

王之宗

李扶

宣廷式

王祚

齊秉鈞

殷璞

祝繼元

李寶約

顏肅

張綸

商玟

殷尙質

漢

蔡啟盛案此前志過略且沒原書之名均遜新通志故仍初稿所轉寫惟改照職官序次於前志之同弗贅異則與州縣志咸資案據補正焉先經俞孝廉校以正史有增無改爰將新通志悉加注明龔遂字少卿山陽南平陽人爲人忠厚剛毅有大節宣帝時渤海饑盜賊起二千石不能制上以遂爲渤海太守時遂年七十餘形貌短小召見問何以息盜遂對民困飢寒而吏不恤故使陛下赤子盜弄陛下兵於潢池耳唯緩之然後可治願丞相御史無拘臣以文法得一切便宜從事許之乘傳

至境悉罷捕盜吏諸持鉏鉤田器者吏毋得問持  
兵者乃爲盜郡吏以兵迎者遂皆遣還單車獨行  
至府盜聞遂令皆解散棄其弓弩而持鉤鉏羣盜  
悉平遂乃開倉廩假貧民選用良吏尉安牧養焉  
民有帶持刀劍者使賣劍買牛賣刀買犢曰何爲

佩牛帶犢春夏督耕秋冬課斂勞來循行民皆富

實

新通志引漢書 俞宗廉按此率從新通志錄  
出閒有從府州縣志錄出以所引原書校之多

非其舊文雖歧異而義無違失者  
仍之惟事實不符則略加按語

彭宏宛人哀帝時爲漁陽太守偉容貌能飲飯有

威於邊以不附王莽遇害

新通志引後漢書彭寵傳

郭伋字細侯扶風茂陵人哀平閒爲漁陽都尉光武時爲中山太守轉漁陽太守時漁陽民多猾惡寇賊充斥伋示以信賞糾戮渠帥盜賊銷散匈奴數犯郡界伋整勒士馬設攻守之畧匈奴畏憚不敢復入塞民得安業在職五歲戶口增倍

朱浮字叔元沛國蕭人光武時爲幽州牧守薊城遂討定北邊年少有才能頗欲厲風迹收士心辟召州中名宿以爲從事

邳壽字伯孝汝南西平人善文章以廉能稱章帝時爲冀州刺史時冀部屬郡多封諸王賓客多放

縱類不檢節壽案察之無所容貸乃使部從事專任王國又徙督郵舍王宮外動靜得失卽時馳奏於是藩國畏懼並爲遵節視事三年冀土肅清壽雖威嚴而推誠下吏皆願効死莫有欺者

李恂字叔英安定臨涇人少習韓詩教授諸生常數百人肅宗時拜侍御史持節使幽州宣布恩澤撫慰北狄所過皆圖寫山川屯田聚落百餘卷悉封奏上肅宗嘉之

左雄字伯豪南郡涅陽人安帝時舉孝廉稍遷冀州刺史州部多豪族好請託雄常閉門不與交通

奏案貪猾二千石無所回忌後拜議郎時順帝新

立朝多闕政雄數上言其辭深切明達政體

俱同上

馮煥安帝時爲幽州刺史疾忌姦惡數致其罪時  
立菟太守姚光亦失人和建光元年怨者迺詐作  
璽書譴責煥光賜以歐刀又下遼東都尉龐奮使  
速行刑奮卽斬光收煥煥欲自殺緹疑詔文有異  
止煥曰大人在州志欲去惡實無它故必是凶人  
妄詐規肆姦毒願以事自上甘罪無晚煥從其言  
上書自訟果詐者所爲徵奮抵罪會煥病死獄中  
帝愍之賜煥光錢各十萬以子爲郎中緹由是知

名家富好施賑赴窮急爲州里所歸愛

後漢書馮緄傳

樊準字幼陵南陽湖陽人少勵志行修儒術以先  
父產業數百萬讓孤兄子永初之初連年水旱郡  
國饑困準上書請遣使持節廩貸卽以準守光祿  
大夫使冀州到部開倉廩貸俾安生業流人咸得  
蘇息還拜鉅鹿太守時饑荒之餘人庶流亡家戶  
且盡準督課農桑廣施方畧期年閒穀粟豐賤數  
十倍而趙魏之郊數爲羌所鈔暴準外禦寇虜內

撫百姓郡竟以安

新通志引後漢書

蘇章字孺文扶風平陵人少博學能屬文順帝時

遷冀州刺史故人爲清河太守章行部案其姦賊  
乃請太守爲設酒肴陳平生之好甚歡太守喜曰  
人皆有一天我獨有二天章曰今夕蘇孺文與故  
人飲者私恩也明日冀州刺史案事者公法也遂  
舉正其罪州境知章無私望風畏肅

周舉字宣光汝南汝陽人舉博學洽聞爲儒者所  
宗故京師爲之語曰五經縱橫周宣光順帝時舉  
茂才爲冀州刺史正身率下風俗頗革後奉使巡  
行風俗劾奏姦猾表薦公清朝廷稱之  
俞宗濂按本傳風俗  
頗革乃舉爲并州刺史時事謂太原一郡  
冬中寒食之俗頗革也與冀州無涉

第五種字興先京兆長陵人少厲志義爲吏冠名  
州郡桓帝時以司徒掾清詔使冀州廉察災害舉  
奏刺史二千石以下所刑免甚衆棄官奔走者數  
十人還以奉使稱職拜高密侯相

第五  
倫傳

朱穆字公叔南陽宛人五歲便有孝稱及壯耽學  
銳意講誦桓帝永興元年河溢百姓荒饑冀州盜  
賊尤多擢穆爲冀州刺史州人有宦者三人爲中

常侍並以檄謁穆穆疾之卻不見冀部令長閭穆  
濟河解印綬去者四十餘人到部以威畧權宜盡  
誅賊渠舉劾權貴宦者趙忠喪父歸葬僭用璽璠

玉匣偶人穆下郡案驗吏畏其嚴明發墓剖棺陳尸出之而收其家屬帝聞大怒徵穆詣廷尉輸作左校太學生劉陶等詣闕訟冤乃赦出之穆在冀州所辟用皆清德長者多至公卿州郡

朱暉傳

范滂字孟博汝南征羌人少厲清節爲州里所服舉孝廉桓帝時冀州饑荒盜賊羣起乃以滂爲清詔使案察之登車攬轡慨然有澄清天下之志及至州境守令自知賊汗望風解印綬去其所舉奏莫不厭塞衆議

蔡衍字孟喜汝南項人少明經講授以禮讓化鄉

里有爭訟者輒詣衍決之其所平處皆無怨桓帝時舉孝廉遷冀州刺史中常侍貝瑗託其弟恭舉茂才衍不受乃收齋書者案之又中常侍曹騰弟鼎爲河間相賊罪千萬騰使大將軍梁冀作書請之衍不答鼎竟坐罪

羊陟字嗣祖太山梁父人少清直有學行桓帝時舉孝廉再遷冀州刺史奏案貪濁所在肅然

賈琮字孟堅東郡聊城人舉孝廉靈帝時爲冀州刺史舊典傳車駟駕垂赤帷裳迎於州界琮之部升車言曰刺史當遠視廣聽糾察美惡何有自垂

惟裳以自掩塞乎乃命御者蹇之百姓聞風竦震

其諸賊過者望風解印綬去唯癭陶長董昭

今甯晉地

觀津長黃就

今武邑地

當官待琮於是州界肅然

皇甫嵩字義真安定朝那人少有文武志介好詩

習弓馬舉孝廉茂才靈帝時黃巾賊起拜嵩爲左

車騎將軍領冀州牧嵩奏請冀州一年田租以贍

饑民帝從之百姓歌曰天下大亂兮市爲墟母不

保子兮妻失夫賴得皇甫兮復安居嵩溫恤士卒

甚得衆情每軍行頓止須營幔修立然後就舍帳

軍士皆食已乃嘗飯吏有因事受賂者嵩更以錢

物賜之吏懷慙或至自殺爲人愛慎盡勤前後上表陳諫有補益者五百餘事皆手書毀草不宣於外又折節下士門無留客時人皆稱而附之

劉虞字伯安東海郟人舉孝廉靈帝時遷幽州刺史民夷感其德化自鮮卑烏桓夫餘濊貊之輩皆隨時朝貢莫敢擾邊百姓歌悅之公事去官中平四年張舉張純與烏桓連盟攻薊下明年復拜虞幽州牧虞到薊罷省屯兵務廣恩信遣使告烏桓峭王等以朝恩寬宏許開善路又設賞購舉純舉純走出塞餘皆降散舊幽部應接荒外資費甚廣

歲常剖青翼賦調二億有餘以給足之時處處斷絕委輸不至而虞務存寬政勸督農植開上谷胡市之利通漁陽鹽鐵之饒民悅年登穀石三十青徐土庶避黃巾之亂歸虞者百餘萬口皆收視溫恤爲安生業民皆忘其遷徙崇尚儉約遠近豪俊夙僭奢者莫不改操而歸心焉時冀州刺史韓馥等以朝廷幼冲逼於董卓遠隔關塞不知存否以虞爲宗室長者欲立爲主請虞領尙書事承制封拜虞斬其使

崔琰字季珪清河東武城人少樸訥獻帝時曹操

破袁氏領冀州牧辟琰爲別駕從事謂琰曰昨按  
戶籍可得三十萬衆故爲大州也琰曰今天下分  
崩九州幅裂二袁兄弟親尋干戈冀方烝庶暴骨  
原野未聞王師仁聲先路存問風俗救其塗炭而  
計校甲兵唯此爲先斯豈鄙州士女所望於明公  
哉操改容謝之

張堪字君游南陽宛人志美行厲少有神童之號  
光武時拜漁陽太守捕擊姦猾賞罰必信吏民畏  
服時匈奴以萬騎入寇堪率千騎奔擊破之郡界  
以靜乃於狐奴開稻田八千餘頃勸耕種以致殷

富百姓歌曰桑無附枝麥秀兩歧張君爲政樂不可支視事八年匈奴不敢犯塞

范遷字子盧沛國人有清行明帝時爲漁陽太守以智略安邊匈奴不敢入界及在公輔盡以田宅推與兄子其妻嘗謂曰君有四子可餘俸祿以爲後世業遷曰吾備位大臣而蓄財求利何以示後世及薨家無擔石焉

郭丹傳

廉范字叔度京兆杜陵人父遭喪亂客死於蜀范年十五辭母西迎父喪既與客步負喪歸葭萌載船觸石破沒范抱持棺柩遂俱沈溺眾傷其義鈞

求得之療救得生明帝永平七八年爲漁陽太守

北匈奴入雲中遂至漁陽范擊卻之

俞宗濂按後漢書本傳范

未嘗爲漁陽太守匈奴入塞乃守雲中事亦非在永平七八年也初稿率沿新通志未及悉正因特識於此以概其餘

周紆字文通下邳徐人明帝時補南行唐長到官

曉吏人曰朝廷不以長不肖使牧黎民而性讐猾

吏志除豪賊且勿相試遂殺縣中尤無狀者數十

人吏人大震後爲渤海太守紆雖刻削少恩而廉

潔公平卒免於世

張顯安帝時爲漁陽太守鮮卑入寇顯率吏士追

出塞遙望虜營煙火急趨之兵馬掾嚴授慮有伏

兵諫止不聽前載伏兵發顯中流矢與兵馬掾嚴

授主簿衛福俱歿於陣詔書褒歎厚加賞賜

劉茂傳

李膺字元禮潁川襄城人性簡默無所交接惟以

同郡荀淑陳寔爲師友桓帝時舉高第再遷漁陽

太守人皆奉令畏威後爲烏桓校尉鮮卑數犯塞

膺常蒙矢石破之虜甚憚懾應奉上疏稱膺威著

幽并

俞宗濂按本傳云初舉孝廉爲司徒胡廣所辟舉高第再遷青州刺史復徵再遷漁陽太

守尋轉蜀郡太守以母老乞不之官轉烏桓校尉

以公事免官永壽二年復徵爲度遼將軍胡廣初爲司徒在順帝漢安元年歷冲質兩朝桓帝卽位則已爲太尉矣延熹九年復爲司徒又在膺爲度

遼將軍之後此云桓帝時舉高第與原書不合新  
通志等引書謂某在某帝時爲某官者多如此今  
舉一以明  
其不確

王暢字叔茂山陽高平人少以清實爲稱無所交  
黨桓帝時爲漁陽太守所在以嚴明稱陳蕃薦暢

清方公正有不可犯之色

王翼傳

楊璇字機平會稽烏傷人初舉孝廉靈帝時爲渤海太守所在有異政

陸康字季甯吳郡吳人少仕郡以義烈稱靈帝時

除高成令

今鹽山縣

縣在邊陲舊制令戶一人具弓弩

以備不虞長吏新到輒發民繕修城郭康至皆罷

遺百姓大悅以恩爲治寇盜亦息

俱同上

三國魏

崔林東武城人文帝時爲幽州刺史在官一期寇

竊寢息

新通志引  
大清一統志

晉

張華范陽人武帝時持節出督幽州諸軍事招納

遠人四境無虞士馬強盛

據前  
志補

唐彬字儒宗魯國鄒人有經國大畧武帝時北虜  
侵掠北平以彬爲使持節監幽州諸軍事領護烏  
桓校尉右將軍彬至鎮訓卒利兵廣農重稼震威

耀武宣諭國命示以恩信於是鮮卑二部大莫廐  
撻何等并遣侍子入貢兼修學校誨誘無倦仁惠  
廣被遂開拓舊境復秦長城塞自溫城洎於碣石  
縣互山谷且三千里分軍屯守烽堠相望由是邊  
境獲安無犬吠之警自漢魏征鎮莫之比焉鮮卑  
諸種畏懼遂殺大莫廐彬欲討之恐列上俟報虜  
必逃散乃發幽冀車牛參軍許祗密奏之詔遣御  
史檻車徵彬付廷尉以事直見釋百姓追慕彬功  
德生爲立碑作頌

新通志  
引晉書

山濤河內懷人爲冀州刺史甄拔賢才三十餘人

重刊三海月元二  
皆顯名當時

前志

衛瓘字伯玉安邑人泰始初都督幽州諸軍事於  
時幽并東有務桓西有力微並爲邊害瓘離間二  
虜務桓降力微憂死朝廷嘉其功賜一子亭侯瓘  
乞以封弟

同上

魏舒字陽元任城樊人拜散騎常侍出爲冀州刺  
史在州三年以簡惠稱入爲侍中

晉書

劉宏字季和沛國相人有幹畧武帝時以甯朔將  
軍假節監幽州諸軍事領烏丸校尉甚有威惠一

時寇盜屏迹爲幽朔所稱

新通志  
引晉書

丁紹字叔倫譙國人開朗公正武帝時轉冀州刺史到鎮率州兵討破汲桑有功加甯北將軍假節監冀州諸軍事時境內羯賊爲患詔捕誅之號令嚴肅河北人畏而愛之紹自以才足爲物雄當官莅政每事克舉慨然有董正四海之志永嘉三年暴疾卒臨終歎曰此乃天亡冀州豈吾命哉懷帝策贈車騎將軍

段匹磾東郡鮮卑人懷帝時爲幽州刺史與劉琨同獎王室後琨被害晉人離散北依邵續續敗爲石季龍所逼匹磾著朝服持節出見季龍曰我受

國恩志在滅汝不能死又不能爲汝敬也比到襄國見石勒又不爲禮常著朝服持晉節經年乃被

害俱同上

劉琨字越石中山人永嘉三年拜都督幽州三州諸軍事與段匹磾約爲兄弟同獎王室元帝中興

加琨太尉後爲匹磾所害追諡曰愍

據前志補

邵續字嗣祖魏郡安陽人樸素有志烈博覽經史元帝中興歸晉拜右將軍冀州刺史後爲石虎所執使續降其城續呼其兄子竺等曰吾志雪國難以報所授不幸至此汝等努力自勉勿有二心遂

被害帝聞續沒詔以其子緝授續本位使總率所

統

新通志  
引晉書

何尙之字彥德潯江人履道立操爲陳郡謝混所

知家貧義命自安仕晉爲臨津令有能名

南皮縣  
志原注

按宋熙甯六年臨津省入南皮 案前志沿革意亦據此故於梁臨津令劉杏入職官作南皮令也

新通志自以臨津爲今甯津初稿於沿革旣不能駁則此應據補

北魏

長孫嵩代人從太祖征中山除冀州刺史賜爵鉅

鹿公所在著稱

新通志  
引魏書

韓均安定武安人初厯定青冀三州刺史甚有聲

譽廣阿澤在定冀相三州界土曠人稀多有寇盜  
以均在冀州劫盜止息除大將軍廣阿鎮大將加  
都督三州諸軍事均清身率下禁斷奸邪於是趙  
郡劫害爲業者皆震蹙後復授定州刺史百姓安

之

新通志  
引北史

陸侯代人少聰慧有策畧世祖以爲冀州刺史時  
考州郡治功惟侯與河內邱陳爲天下第一

新通志  
引

魏書

源賀禿髮傳檀之子初名破羌世祖器其機辯賜  
姓名源賀高祖時出爲征南將軍冀州刺史賀以

邊寇方深疆場猶須防戍上書言自非大逆赤手  
殺人之罪其坐賊及盜與過諸愆應入死者皆可  
原命責守邊境是則已斷之體更受全生之恩徭  
役之家漸蒙休息之惠高宗納之已後入死者皆  
恕死徙邊久之謂羣臣曰源賀勸朕宥諸死刑徙  
充北番諸戍自爾至今所活不少生濟之理既多  
邊戍之兵有益苟人人如賀朕復何憂哉賀臨州  
鞠獄以情徭役簡省時考殿最賀治爲第一

元雲高宗弟封任城王顯祖時爲冀州刺史性善  
撫綏留心政事甚得下情合州請戶輸絹五尺粟

五升以報雲恩高祖嘉之

李平字曇定頓邱人高祖時拜長樂太守政務清靜後兼冀州儀同開府長史甚著聲稱世宗時元愉反以平持節都督北討諸軍行冀州事大破逆眾追擒之冀州平

李韶字元伯隴西狄道人肅宗初爲冀州刺史清簡愛民甚收民譽政績之美聲冠當時肅宗嘉之轉定州刺史及赴中山冀州父老皆出境送相聚而泣定州百姓素聞風誨州內大治

裴延儁字平子河東聞喜人事後母以孝聞肅宗

時轉平北將軍幽州刺史范陽燕郡有舊督亢渠  
漁陽郡有故戾陵諸堰皆廢毀多時莫能修復水  
早不調民多飢餒延儻相度水形隨力分督未幾  
而就溉田百餘萬畝爲利十倍百姓賴之又修起  
學校禮教大行在州五年考績爲天下最

元孚字秀和宗室少有令譽肅宗時拜冀州刺史  
勸課農桑境內稱爲慈父鄰州號曰神君先是州  
人張孟都等八家皆保屯林野不臣王命州郡號  
曰八王孚至皆請入城願致死効力後爲葛榮所  
陷被執與兄裕爭相爲死榮曰此魏之誠臣義士

也皆得免還復除冀州刺史

崔休字惠盛清河東武城人少孤貧矯然自立世宗初除渤海太守性嚴明雅長治體下車先戮豪猾數人廣布耳目所在奸盜莫不擒翦百姓畏之寇盜止息清身率下渤海大治時大儒張吾貴弟子自遠而至者恆千餘人生徒既衆所在多不見容休乃爲設俎豆招延禮接使肄業而還儒者稱之歷冀州大中正尋除平北將軍幽州刺史休聰明疆濟雅善決斷剖判詞訟殊無疑滯清白愛民

甚著聲績

俱同上

畢聞慰東平須昌人正光初遷滄州刺史甚有政

績

魏書畢敬羣傳

慕儁河南洛陽人孝莊帝時遷滄州刺史甚爲吏

人畏悅

魏書

陸子彰代人興和中以侍中行滄州事甚有時譽

加以虛己納物人士敬愛之

魏書陸侯傳

堯雄字休武上黨長子人少驍果善騎射輕財重

氣節孝靜時爲瀛州刺史時禁網疏濶官司相與

聚斂唯雄義然後取復能接下以恩甚爲吏民懷

附興和三年領司冀瀛定齊青膠兗殷滄十州士

卒巡行西南分守險要遂卒於鄴

新通志引北齊書

封隆之渤海蓀人魏時四爲冀州刺史每臨部州

中舊齒咸曰我封公復來其得物情如此

據前志補

元孝友少有時譽孝靜時累遷滄州刺史爲政溫

和無所侵犯在郡積年百姓便之

新通志引魏書

高洙字子深齊高祖第五子初仕魏武定六年爲

滄州刺史爲政嚴察部內肅然纖芥知人閒事合

境號爲神明時滄州有鹿脯被盜者告州洙令僚

吏分市鹿脯不限其價其主認脯推獲盜者轉都

督定州有被盜黑牛背有白毛洙詐爲上府市牛

皮倍償價值盜亦遂獲又有老母種菜三畝數被偷泚令人密往書菜葉爲字明日市中看菜葉有字獲賊爾後境內無盜政化爲天下第一

北齊有書

主簿張達嘗詣州夜投人舍食雞羹泚對衆曰食

雞羹何不還價值達伏罪

據前志補

邢晏河閒鄭人爲滄州刺史爲政清靜吏人安之

魏書

元拔干宗室遼西公意烈之子博知古今有計畧

太宗時除渤海太守吏人樂之

前志

宋稚字季預孝明帝時位渤海太守子遊道弱冠

隨父在郡父亡吏人贈遺一無所受

裴彥先聞喜人叔業從子也少有志尚封雍邱子  
位渤海相子約字元儉性頗剛饒襲爵冀州大丞  
賊起勅爲別將行渤海郡事城陷見害

庾導潁川人歷覽史傳善草隸書輕財重義爲饒  
安合廉明幹濟編氓頌之俱同上

李繪字敬文平棘人北魏靜帝時以瀛州刺史使

梁還拜高城內史墾田倍增家給人足

鹽山縣志

北齊

高叡小名須拔高祖弟子性至孝嫻習吏職有知

人之鑒天保二年出爲定州刺史時年十七留心  
庶事糾摘姦罪勸課農桑接禮民僑所部大治稱  
爲良牧七年都督滄瀛幽安平東燕六州諸軍事  
滄州刺史八年都督北燕北蔚北恆三州及長城  
諸鎮量置烽戍內外防禦備有條法大爲兵民所  
安有無水之處禱而掘井泉源湧出號曰趙郡王

泉

新通志引  
北齊書

王士良字君明代人少修謹不妄交遊事繼母梁  
氏以孝聞及卒居喪毀瘠文宣自臨視之疾愈除

滄州刺史

前志

鄭述祖字恭文開封人義之元孫少聰敏好文有  
風檢以丞相右長史行瀛滄二州事所在皆有惠

政同

北周

于翼洛陽人大象初巡長城立亭障西自雁門東  
至碣石創新改舊得其要害仍除幽定七州諸軍  
事幽州總管先是突厥屢寇燕代間士農失業自  
是不敢犯塞百姓安之

新通志引  
北周書

陰壽武城人周時拜幽州總管高寶甯反引突厥  
攻圍北平壽率騎數萬出盧龍塞討之諸縣悉平

寶甯走契丹爲磨下所殺北邊遂安

同上

隋

趙照字通賢天水人隋文帝時爲冀州刺史有威  
德照嘗有疾百姓爭爲祈禱冀市多詐照爲銅斗  
鐵尺置諸肆百姓便之有人盜照田中蒿爲吏所  
執照曰刺史不能宣風化彼何罪也賜盜蒿一車  
盜愧過於重刑

前志

張照字士鳴河間鄭人開皇中兩爲冀州刺史吏  
人悅服稱良二千石

寶宗陵川人文帝時舉賢能遷南樂令有異政陞

滄州刺史因與竇建德兵相持甚久自度力不敵  
遂奔磁州蒼蒐山建德兵至圍之不解宗望闕再  
拜而逝磁人廟祀之

俱同上

郭絢河東安邑人煬帝以涿郡爲衝要聞絢有幹  
局拜郡丞吏人悅服獲遷通守兼領留守及山東  
盜起絢逐捕多獲時諸郡無復完者惟郡獨全後  
將兵擊竇建德於河間戰死吏人哭之數月不息

新通志  
引隋書

唐

裴懷古壽州壽春人中宗時爲幽州都督綏懷兩

番將舉落內屬清介審慎韓琬稱其馭士信臨財

廉爲國名將云

舊通志

姜師度滄州景城郡刺史東南二十里有渠注毛氏河東南七十里有渠注漳河並引浮水皆師度

開

前志案此未及後爲諸使事

薛季昶絳州龍門人武后時夏官郎中侯虛味將兵討契丹不利妄言賊行有蛇虎導軍后惡其詭拜季昶爲河北道按察使季昶馳至軍斬虛味以聞威震北方藁城尉吳澤射殺驛使髡民女髮爲鬘州不能劾季昶杖殺之然後布恩信甄表善良

新通志  
引唐書

狄仁傑字懷英并州太原人武后時擢魏州刺史  
轉幽州都督賜紫袍龜帶后自製金字十二於袍  
以旌其忠魏人爲立祠後突厥人趙定殺掠甚眾  
詔仁傑爲河北道行軍元帥寇退更拜河北安撫  
大使時民多脅從於賊賊去懼誅多逃匿仁傑疏  
奏赦之卒封梁國公元和中田宏正鎮魏博復葺

其祠立碑祀之

同上

宋璟南和人睿宗朝拜幽州都督有威名

據前志補

韓琬字茂貞鄧州南陽人睿宗時監河北軍兼按

察使時賦絹非時於是穀賤縑益貴丁例二縑人多徙亡琬曰御史乃耳目官知而不言尚何賴又上言須報則弊益甚移檄罷督乃聞詔可

新通志引唐書

裴寬絳州聞喜人性通敏元宗時拜范陽節度使時北平軍使烏承恩虜酋也與中人數冒賄寬以法繩治檀州刺史何僧獻生口數十寬悉歸之故夷夏感附爲政清簡所莅人愛之

張守珪陝州河北人姿幹瓌壯慷慨尚節義元宗時爲幽州長史河北節度副大使加採訪處置等使契丹奚連年梗邊前長史不能制守珪至每戰

輒勝虜遂大敗帝嘉之詔有司告九廟契丹酋屈刺及突干遣使詐降守珪得其情遣右衛騎曹王悔開誘契丹別將李過折夜斬屈刺及突干以衆降傳屈刺突干首於東都詔立碑紀功焉

苗晉卿字元輔潞州壺關人性寬厚元宗時爲魏郡太守充河北採訪使居三年政化大行魏人爲立生祠立石頌美

李光弼營州柳城人嚴毅沈果有大略元宗時加魏郡太守河北採訪使祿山反光弼以朔方兵五千出土門求救常山自顏杲卿死常山爲戰區露

齒蔽野光弼酌而哭之出爲賊幽閉者厚卹其家  
屢出奇兵襲賊且盡後復會郭子儀兵合擊賊九  
門收棗城等處十縣遂攻趙郡詔加光弼范陽節  
度使時景城河間等六郡結營自守以附光弼急  
攻趙拔之士多虜掠光弼收所獲悉歸之民城中  
大悅又與子儀合擊史思明於嘉山大破之肅宗  
時以光弼兼幽州大都督府長史知諸道節度行  
營事又代子儀爲朔方節度使營壘士卒麾幟無  
所更而光弼一號令之氣色乃益精明其用兵必  
謀定而後戰能以少覆衆治師訓整初與郭子儀

齊名世稱李郭而戰功推爲中興第一

張孝忠字孝忠本奚種始名阿勞以勇聞燕趙閒  
性寬裕事親孝德宗時爲成德軍節度使敗李惟  
岳於東鹿復詔定州置義武軍以孝忠爲節度易  
定滄等州觀察使時朱滔與王武俊叛遣人說之  
答曰吾旣爲唐臣而天性樸彊業已効忠不復助  
惡矣易定介二鎮閒孝忠浚溝壘修器械乘城固  
守滔悉兵攻之不克解去貞元二年河北蝗民飢  
孝忠與其下同粗淡日膳裁豆藟而已人服其儉  
推爲賢將

李寰德宗時使守博野王廷湊叛與樂壽傅良弼皆堅壁固守後擢保義節度使復授橫海節度使廷湊之亂也聯軍十五萬無成功而樂壽博野截然時中者累歲議者以爲難

溫造字簡與并州祁人姿表瑰傑德宗時以張建封薦署造節度參謀使幽州說劉濟語未訖濟俯伏流涕願率先諸侯効死節穆宗時爲太原幽鎮宣諭使賜緋衣至范陽劉總囊鞬郊迎造爲開示禍福總懼矍然若兵在頸由是籍所部九州入朝田宏正遇害復宣慰鎮州行營

烏重胤字保君憲宗時徙橫海軍節度使建言河朔能拒朝命蓋由刺史失權鎮將領兵能作威福臣所管三州輒還刺史職各主其兵因請廢景州法制修立時以爲宜重胤善撫士卒與下同甘苦故能得士心

殷侗陳州人通經術樂講道文宗時拜義昌節度使值瘠荒之餘骸骨蔽野墟里生荆棘侗單身之官安足麤淡與下共甘苦以仁惠爲治歲終流戶襁屬而還遂爲營田勾耕牛三萬詔度支賜帛四萬匹佐其市初州兵三萬仰廩度支侗始至一歲

自以賦入贍其半二歲則周用乃奏罷度支所俱  
上

杜中立

太平廣記徵應門引玉泉子作杜皋字中立蓋以字行也

相州人拜駙

馬都尉宰相欲厯試其能更出爲義昌軍節度使

舊徭車三千乘歲輓鹽海濱民苦之中立置飛雪

將數百人俱舟以載自是民不勞軍食足矣大中

十二年大水泛徐兗青鄆而滄地積卑中立自按

行引御水入之毛河東注海州無水災

唐書杜兼傳

渾侖字復貴咸甯王瑊子也天子謀滄海帥視侖

曰無以易爾咸通二年授義昌軍節度使至卽蠲

逋賦甚眾先是并爲海染人不可飲遂闕河以汲  
舟行則決之又輒塞偏派鑿局蓄舟來不留梗汲  
不息至今賴之有田千頃游惰者不顧偏悉闢爲  
膏腴窮民有鬻子者爲贖歸故校有孤女者時其  
配偶具棺葬暴骨作室郵亭具粟帛以庇往來歲  
比不稔給軍未贍峙糧十六萬石以爲儲蓄大抵  
能推誠於下辛苦率先民愁未解公費未足孜孜  
籌度雖人之去已疾謀家温不如也以故感神祝  
來瑞烏百姓謳歌借留護戎奏狀天子嘉焉詔曰  
辛卒教化之許留旬歲五年秋受代歸

路嚴渾  
偏碑

薛大鼎字重臣蒲州汾陰人武德末爲滄州刺史時無棣渠久廢塞大鼎浚治屬之海商賈流行里民歌曰新溝通州楫利屬滄海魚鹽至昔徒行今

騁駟

新通志  
引唐書

李乾祐雍州長安人母卒廬墓側負土成墳太宗旌其閭爲邢魏三州刺史強直有器幹復爲滄州

刺史

同上

解琬魏州元城人神龍中授滄州刺史爲政得大

體部人順附

滄州  
志稿

郭英傑字孟武瓜州晉昌人元宗時爲幽州副總

管長史薛楚玉遣英傑與裨將吳克勤討契丹屯  
榆關官軍不利英傑克勤力戰死其下尙六千人  
殊死戰虜示以英傑首終不屈師遂殲

新通志  
引唐書

裴觀開元十三年帝自擇刺史時觀以左衛將軍  
爲滄州刺史與景先等凡十一人治行詔宰相諸  
王御史以上祖道洛濱盛具奏太常樂帛舫水嬉  
命高力士賜詩帝親書且給紙筆令自賦賚絹三  
千遺之

前  
志

田廷玠尙儒學不樂軍旅與承嗣本爲從昆弟爲  
平舒丞遷樂壽清池東城河閒四縣令以治稱遷

滄州刺史李寶臣朱滔與承嗣不協合兵圍滄州

廷玠固守連年食雖盡無叛者朝廷嘉其節徙相

州子宏正

唐書田宏正傳

宏正幼通兵法善於騎射承嗣

愛之以爲必興吾宗名之曰興王承宗叛詔宏正

以全師壓境破其眾南宮承宗大懼歸窮於宏正

宏正表諸朝遂獻德棣二州以謝納二子爲質

據前

志補

穆甯懷州河內人剛直有氣節元宗時爲鹽山尉

安祿山反署劉道元爲景城守甯募兵斬之檄州

縣并力捍賊史思明掠境郡守調甯攝東廣令禦

直不...  
之賊遣使誘甯甯斬以徇

新通志  
引唐書

### 五代

符存審字德詳陳州宛邱人少豪俠多智算初歸  
晉王王以爲義兒軍賜姓李氏時晉趙攻燕梁救  
燕存審與史建塘擊走梁軍遷領邢州團練使復  
隨莊宗軍魏縣敗劉鄩於故元城授存審邢洺磁  
三州觀察使未幾徙存審橫海軍節度使契丹圍  
幽州存審請以五千騎救之擊走契丹復討張文  
禮於鎮州平之存審爲將有機略大小百餘戰未  
嘗敗契丹攻遮虜復以存審爲盧龍節度使卒

於幽州臨終戒其子曰吾少提一劍去鄉里四十年閒取將相然履鋒冒刃出死入生而後至此也因出其平生身所中矢鏃百餘而示之曰爾其勉

哉

新通志引  
五代史

趙德鈞唐同光中鎮蘆臺軍因其地產鹽課民自辦仍置榷鹽院貿易於瀛鄭閒民甚賴之

據前  
志補

王景萊州掖縣人晉開運二年拜橫海軍節度乾祐初加同平章事會契丹饑幽州民多度關求食至滄州境者五千餘人景善懷撫給田處之

前  
志

薛居正字子平開封人周顯德六年使滄州定民

租未幾以材幹聞於朝擢刑部侍郎

據前志補

劉杳爲臨津令治化翔洽通邑愛慕秩滿當遷去

縣民三百餘赴闕借寇詔許之

同上

宋

王嗣宗字希阮汾州人少力學自奮游京師以文謁王祐頗見優待開寶八年登進士甲科太宗時通判澶州并河西東植樹萬株以固隄防上言本州權酷斗量校以省斗不及七升民犯私釀者三石以上坐死有傷深峻請準省斗定罪從之復爲河北轉運副使時邊境用兵崔翰爲大將嗣宗每

以苦言激其展効及移河北轉運使貝州驍捷卒

五十人謀竊發嗣宗率吏悉擒之

新通志  
引宋史

田錫字表聖嘉州洪雅人幼聰悟好讀書屬文太宗時爲河北轉運副使驛書言邊事請申飭將帥慎固封守勿尙小功許通互市俘獲蕃口撫而還之如此不出五載河朔之民得務農業亭障之地可積軍儲書奏上嘉之

宋準字子平開封雍邱人形神偉茂辭采清麗太宗時爲河北轉運使有治聲

何承矩字正則河南人太宗時爲制置河北緣邊

屯田使自順安以東資其陂澤築隄貯水爲屯田  
且遏敵騎之奔軼期歲閒闕南諸泊悉壅闕瀕海  
廣袤數百里盡爲稻田而有莞蒲蜃蛤之饒民賴  
其利淳化四年知滄州踰年徙雄州推誠御衆同  
其甘苦邊民有告機事者屏左右與之款接故契  
丹動息皆能前知契丹夜襲城下承矩出戰擊走  
之後召還州人詣闕貢馬請留詔許之眞宗時出  
知澶州復拜雄州團練使又爲緣邊安撫使承矩  
自守邊以來意在朝廷懷柔遠人爲息兵之計收  
地利以實邊設險固以防塞春夏課農秋冬習武

休息民力以助國經故任邊稱有功焉

裴莊字端已閬中人太宗時通判澶州鎮帥魏咸信表其能復爲眞定通判時契丹掠趙深邊將無功莊上書請申明紀律無使玩寇又言緣邊砦柵戍兵旣寡戎人易以襲取請廢罷以益州兵會詔建方田莊復上言大役兵師慮生事於邊鄣帝善之後爲河北轉運使

陳恕字仲言多識典故精於吏理太宗時知大名府後知澶州召爲河北東路營田制置使太宗諭以農戰之旨恕對曰古者兵出於民無寇則耕寇

至則戰今之戎士皆以募致衣食仰給縣官若使  
之冬持兵禦寇春執耒服田萬一生變悔無及矣  
詔止令修完城堡通導溝瀆而已營田之議遂寢  
李斌青州人太宗時爲洺州團練使勤於政理人  
服其清後徙滄州及代吏民不忍其去鄰境亦上  
其善狀詔書褒美之

盧玟字錫圭淄川人眞宗時爲河北轉運副使時  
北鄙未靖調發軍儲糧道不絕以職務修舉遷秩  
賜金紫會城祁州命董其役再爲河北轉運使玟  
勤於吏職所至以幹濟聞

寇瑊字次公汝州臨汝人真宗時爲河北轉運使  
天禧中河決澶淵瑊視役河上隄壑數里衆皆奔  
潰而瑊獨留須臾水爲折去衆異之

李仕衡字天鈞京兆人真宗時爲河北轉運使奏  
罷內帑所助緡錢百萬建言河北歲給諸軍帛七  
十萬而民艱於得錢悉預假於里豪出倍償之息  
以是工機之利愈薄方春民不足請戶給錢至夏  
輸帛則民獲利而官用足矣詔優其直仍推其法  
於天下進都轉運使棣州汚下苦水患奏徙州西  
北七十里旣而大水沒故城丈餘明年旱蝗發積

粟賑民又移五萬斛濟京權知天雄軍民有盜瓜傷主者法當死仕衡以歲饑奏貸之

陳貫字仲通相州安陽人少倜儻真宗時爲河北轉運使請疏徐鮑曹易四水興屯田

向敏中字常之開封人姿表瓌碩性端厚真宗時爲河北安撫大使所至訪民疾苦宴犒官吏莫不感悅敏中善處繁劇洞曉民政真宗嘗稱曰大臣出臨四方惟敏中能盡心民事耳

張士遜字順之陰城人真宗時爲河北轉運使河浸棣州詔徙州陽信議者患糧多不可遷士遜視

潁河數州方艱食卽計餘以貸貧者期來歲輸陽  
信公私利之

劉承宗知信子善射兼習書數眞宗時爲河北緣  
邊安撫都監兼定鎮路兵馬鈐轄改知雄州河北  
緣邊安撫使在郡有治績詔書嘉獎

俱同上

張綸天禧中發運副使居二歲增米八十萬疏五  
渠開長蘆西河以避覆舟後擢天章閣待制

前志字

公信潁州汝陰人少儻任氣眞宗時厯知瀛州  
兩知滄州所至興利除弊尤喜施予

新通志引宋史

李釋字縱之京兆萬年人仁宗時提點河北刑獄

權知貝州歲旱繹爲酒務市民薪草溢常數餓者皆以樵採自給得不死官人亦數倍邊民歲輸防城火牛草十餘萬委積久輒腐敗繹奏罷之歷河北轉運使所至稱治

呂公弼字寶臣壽州人仁宗時爲河北轉運使自寶元慶厯以來宿師備邊旣西北撤警而將屯如故民疲饋餉公弼始通御河漕粟實塞下治鐵以助經費移近邊屯民就食京東增城卒給板築芻宥賦及逋數百萬厯知瀛州

包拯字希仁廬州合肥人親亡廬墓終喪仁宗時

契丹聚兵近塞邊郡稍警命拯往河北調發軍食  
拯曰漳河沃壤不得耕邢洺趙三州民田萬五千  
頃率用牧馬請悉以賦民從之復爲河北都轉運  
使請罷河北屯兵分之河南兗鄆齊濮曹濟諸郡  
設有警無後期之憂借曰戍兵不可遽減請訓練  
義勇少給餼糧每歲之費不當屯兵一月之用一  
州之賦則所給者多矣不報徙知瀛州諸州以公  
錢貿易積歲所負十餘萬悉奏除之拯性峭直惡  
吏苛刻務敦厚雖甚嫉惡而未嘗不推以忠恕也  
劉元瑜字君玉河南人仁宗時提舉河北便糴會

永甯雲翼軍士謀爲變吏窮捕黨與謀劫囚以反  
百姓竊知多逃避元瑜馳至斬爲首者其餘皆釋  
去不問

王彬光州固始人仁宗時爲河北轉運使部吏馬  
崇正倚章獻太后姻家豪橫不法彬發其姦賊下  
吏治之

楊偕字次公坊州中部人仁宗時爲河北轉運使  
按知定州夏守恩賊數萬守恩流嶺南厯知邢州  
徙滄州求面論兵事召還

杜衍字世昌越州山陰人總髮苦志勵操尤篤於

學爲都轉運使不增賦而用足不以威刑督吏然  
吏民亦憚其清整

田京字簡之亳州鹿邑人仁宗時提點河北路刑  
獄事上言請擇要官守滄衛鑿西山石白廢道以  
限戎馬義勇聚教復給糧置卒守烽燧用奇正法  
訓兵徒戰馬內治以息邊費凡十餘事帝嘉納之  
韓絳字子華雍邱人仁宗時河決商胡用李仲昌  
議開六塔河而患滋甚命絳宣撫河北時宰主仲  
昌人莫敢異絳劾其蠹國害民罪不可貸仲昌遂  
竄嶺表遷知瀛州歐陽修率同列言絳宜在朝廷

瀛非所處也後徙知大名府歷知定州哲宗時爲  
北京留守河決小吳都水議傍魏城鑿渠東趨金  
隄役甚棘絳言功必不成徒耗費國力而使魏人  
流徙非計也三奏訖罷之

趙忞字闕道衢州西安人仁宗時爲河北都轉運  
使時賈昌朝以故相守魏忞將按視府庫使來告  
曰前此監司未有按視吾藏者恐事無比若何忞  
曰舍是則他郡不服竟往焉昌朝不悅初有招募  
義勇過期不能辦官吏當坐者八百餘人忞被旨  
督之奏言河北頻歲豐故應募者少請寬其罪以

俟農隙從之坐者獲免而募亦隨足昌朝始愧服  
忤長厚清修人不見其喜愠其爲政善因俗施設  
猛寬不同故所至皆治

張問字昌言襄陽人仁宗時通判大名府羣牧地  
在魏歲久冒入於民有司按籍括之券不明吏持  
詔書奪人田至毀室廬發邱墓問至則曰是豈朝  
廷意耶具上以聞立罷之擢提點河北刑獄大河  
決議築小吳隄言曹村小吳南北相直而曹村當  
水衝賴小吳隄薄水溢北出故南隄無患若築小  
吳則左疆而右傷南岸且決水并京畿爲害獨可

於孫陳兩埽閒起隄以備之耳議久不決小吳卒  
潰神宗時爲河北轉運使所部地震河再決議者  
欲調京東民三十萬自澶築隄抵乾甯問言隄未  
能爲益災傷之餘力役勞民非計也上從其議未  
幾復使河北諸葛公權之亂郡縣株蔓連逮至數  
百人問上疏申理止誅首惡熙甯末知滄州自新  
法行問獨不阿時好歲饑爲帝言民苟免常平助  
役之苦反以得流亡爲幸帝以其異論不用

王沿字聖源館陶人少治春秋眞宗時知宗城縣  
張知白薦其才仁宗天聖閒體亮河朔饑民所至

不俟詔發倉廩濟之就除轉運副使俄知邢州復  
爲河北轉運使奏罷二牧監以地賦民導相衛邢  
趙水下天平景佑諸渠溉田數萬頃復徙知成德  
軍建學校行鄉飲酒禮子鼎字鼎臣仁宗時知深  
州時王則以貝州反深卒龐旦以其徒謀以元日  
殺軍校劫庫兵應之前一日有告者鼎夜出檄遣  
軍校攝事外邑而陰爲之備翊日會僚吏置酒如  
常叛黨愕不敢動鼎刺得實徐捕首謀十八人送  
獄獄具候轉運使至審決軍中謀劫囚鼎謂僚吏  
曰吾不以累諸君獨命取囚桀驚者數人斬於市

一郡帖然轉運使至囚未決者半訊之皆伏誅明年河北大饑人相食鼎經營賑救頗盡力後提點河北刑獄治奸賊益急所劾舉不避貴勢復遷河北轉運使鼎性廉不欺所至不擾當官明敏強直不可撓所薦士多知名有終身不識者

歐陽修字永叔廬陵人慶歷三年知諫院保州兵亂以修爲龍圖閣直學士河北都轉運使賊平大將李照亮通判馮博文私納婦女修捕博文繫獄照亮懼出所納婦

張希一嘗子字簡翁仁宗時厯知冀邢等州復爲

河北緣邊安撫副使請徙邊兵內地以寬糴費每  
州歲爲市平以糴邊穀使人不能高下其價戍卒  
之孥給糧先軍士一日使其家爲伍保坐以逃亡  
之累皆著爲法復爲眞定府路總管累使遼及館  
客遼人嘗以雄州不當禁漁界河及役白溝兩屬  
民爲言希一日界河之禁起於大國統和年今文  
移尙存白溝本輸中國田租我太祖特除之自是  
大國侵牟立稅故名兩屬惡有中國不役之理遼  
人詞塞弟利一字和叔厯知莫冀二州河北緣邊  
安撫都監復知廣信軍謀告遼人宋元寇邊利一

置酒高會於譙門元率眾遁去徙知保州雄州遼  
人刺兩屬民爲兵民不堪其辱利一綏來之有大  
姓舉族南徙募而來者至二萬利一發廩賑恤且  
移詰涿州自是不敢復刺後爲定州路鈐轄徙眞  
定大名府路知滄澶等州終雄州團練使

唐介字子方江陵人仁宗時知莫州任邱縣當遼  
使往來道驛吏以誅案破家爲苦介坐驛門令曰  
非法所應給一切勿與稍毀吾什器者必執之皆  
帖服以去沿邊塘水歲溢害民田中人楊懷敏主  
之欲割邑西地澹漲潦介築堤閑之民以爲利復

爲河北都轉運使厯知瀛州子義問字士宣哲宗時爲河北轉運副使屬邑尉因捕盜誤遺火盜逸去民家被焚訟尉故縱火郡守執尉抑使服義問辨出之方旱而雨

李參字清臣鄆州須城人仁宗時知鹽山縣歲饑諭富室出粟平其直予民不能糴者給以漕糶所活數萬通判定州都部署夏守恩貪濫不法轉運使使參按之得其事守恩謫死後爲河北都轉運使參剛果嚴深發奸摘伏不假貸事至卽決雖簿書纖悉不遺時稱能吏

張燾字景元臨濮人仁宗時提點河北刑獄攝領  
澶州七日而商胡決燾拯溺救飢所全活者十餘  
萬後知瀛州才智敏給處事神速

劉庠字希道彭城人神宗時爲河北都轉運使契  
丹侵霸州土場或言河北不可不備庠上五策料  
其必不動已而果然大河東流議者欲徙而北請  
益兵濟役庠請徐觀其勢而順導之朝廷是其議  
移知真定府有吏能

呂大忠字進伯藍田人神宗時爲河北轉運判官  
言古者理財視天下猶爲一家今有司惟知出納

之名有餘不足未嘗以實告上故有餘則取之不足莫之與甚大患也乃上生財養民十二事

韓贄字獻臣齊州長山人神宗時知滄瀛二州河北都轉運使河決商胡而北贄請開金隄使分注故道支爲兩河可紓水患詔遣使相視如其策才役三千人幾月而畢

滕元發字達道東陽人性豪雋慷慨神宗時河北地大震命元發爲安撫使城舍皆圯吏民懼壓皆幄寢芟舍元發獨處屋下曰屋摧民死吾當以身同之瘞死食飢除田租修隄障察貪殘督盜賊北

道遂安後知定州奏言新法害民請下手詔熙寧三年以來所行有不便者悉罷之不聽復知真定府治邊慍然威行西北號稱名帥

任諒字子諒汝陽人徽宗時爲河北轉運判官著河北根本籍凡戶口之增損官吏之陞降與一歲出納奇贏之數披籍可見上之朝張商英見其書謂爲天下部使者之最

唐恪字欽叟錢塘人徽宗時以起居舍人迎遼使還言河北邊備廢弛宜及今無事以時治之帝壯之遂命爲都轉運使徙知滄州河決水犯城下恪

乘城救理都水孟昌齡移檄索船與兵恪報水勢  
方惡船當以備緩急滄爲極邊兵非有旨不敢遣  
昌齡怒劾之恪不爲動益治水水去城得全詔書  
嘉獎乃上疏請暫免保甲保馬呈閱及復諸縣租  
等第賑貸以寬被水之民未報悉便宜罷行之民

大悅

俱同上

張美自定州節度移鎮滄州持身嚴謹以政蹟聞  
在滄十年世謂之滄州張氏

前志

喬惟岳字伯周陳州南頓人周顯德初登第宋開  
寶中右拾遺劉稹薦其才歷知懷州滄州會考課

京朝官召還兼左諭德轉太常少卿

據前志補

葛懷敏霸之子以蔭授西頭供奉官累官知隰鄆保三州太平興國五年徙知滄州進涇原路兼招討經畧安撫慶曆二年元昊寇鎮戎軍墮敗遂與諸將皆遇害奏至帝嗟悼久之贈鎮戎軍節度使

兼太尉諡忠隱

同上

靳懷德博州高唐人初歷滄莫二州通判眞宗時知滄州召還復遣之任吏民詣轉運使李仕衡借留後知澶州是州居水陸之要懷德悉心撫治能著政績使車往復多稱舉焉

新通志引宋史

趙鎔樂陵人太宗太平興國中知滄州兼兵馬都部署完城壁嚴戰具寇嘗數百騎至境上聞有備

引去

滄州志稿

柴禹錫大名人雍熙中知滄州勤於政治部民詣

濱州列狀以聞

同上

張煦字輔暘開封人太宗時爲鎮定邢趙山西土門路都巡檢使契丹寇境上煦以所部斬首數十

走之歷知滄磁二州事

新通志引宋史

慕容德豐字日新幼聰悟延釗愛之嘗曰興吾門者必此子補山東道衙門指揮使累功爲四方館

使徙知慶州咸平四年改滄州踰年進知貝瀛二

州

據前志補

安守忠字信臣并州晉陽人周平盧軍節度審琦之子也端拱中知滄州改瀛州兼高陽關駐泊部署遷瀛州防禦使淳化二年徙知雄州五年復知滄州至道初移雄州三年復知滄州所至吏民不

忍其去

前志

陳興澶州人事太宗爲御龍駕直都虔候眞宗時知滄州徙鎮定軍部署與曹瑋掩擊蕃寇斬獲甚衆詔嘉獎之官至神龍四廂都指揮使

據前志補

李允則字垂範并州孟人少以材畧聞眞宗時知  
滄州巡視州境濬浮陽湖葺營壘官舍閒穿井未  
幾契丹來攻老幼皆入保而水不乏斲冰代礮契  
丹遂解去厯鎮定高陽三路都行營兵馬都監又  
知瀛州上言擇邊將謹誓約俄知雄州時河北旣  
罷兵允則治城壘不輟契丹疑違約旣而有詔詰  
之允則奏曰初通好不卽完治恐他日頽圯因此  
廢守邊患不可測也帝以爲然始州民多以草覆  
屋允則取材木山西大爲倉廩營舍始教民陶瓦  
甃標里閉歲修禊事召戰棹爲競渡潛寓水戰州

北多設陷馬坑城上起樓爲斥埃允則以南北旣  
和命撤樓夷坑爲諸軍蔬圃浚井疏洫列畦隴築  
短垣縱橫其中而其地益阻隘復命境內有隙地  
悉種榆久之榆滿塞下借阻敵騎上元燃燈結綵  
山聚優樂使夜縱游明日偵北酋欲閒入城中觀  
伺之郊外果有紫衣人至遂與俱入傳舍不交一  
言出奴女羅侍左右劇飲而罷且置其所乘騾廡  
下使遁去卽幽州統軍也後數日爲契丹所誅嘗  
宴軍中而甲仗庫火允則作樂行酒不輟請救不  
答帝使詰之對曰兵械所藏燬火甚嚴方宴而焚

必姦人所爲舍宴而救事或不測一日民有訴爲契丹民毆傷而遁者允則不治衆以爲怯逾月幽州以其事來詰答以無有蓋他謀欲以毆人爲質驗比得報以爲妄乃殺謀天禧聞知鎮州允則不事威儀或閒出與民坐語以是洞知人情訟至面訊立斷善撫士卒皆得其用盜發輒獲身無兼衣食無重羞不蓄資財在河北二十餘年事功最多

新通志  
引宋史

李昭遘宗諤從子也以廕爲將佐主簿幼時楊億嘗過其家出拜億命爲賦旣成億曰桂林之下無

雜木非虛言也累官擢天章閣待制知滄州用諫

官吳及言復改知陝州

據前志補

李壽朋字延老徐州豐人仁宗時知滄州滄地震壞城郭帑庾壽朋以席爲屋督吏采繕葺未數月復其舊括蕪田三萬頃縱民耕擇其壯者使習兵河方北涌隨塞之故道陘壽朋度必東潰諭居人

徙避後三縣四鎮皆墊焉

新通志引宋史

孟元字善長洺州人累官爲高陽關路兵馬鈐轄尋遷權知滄州民鬻鹽爲生歲荒鹽多不售民無以自給元度軍食有餘悉用易鹽繇是民不轉徙

累遷高陽關路馬步軍總管五遷爲馬軍都虞候

前志

李復圭字審言壽朋弟仁宗時通判澶州北使道  
澶民主驛卒困憊土豪杜氏十八家詭言唐相如  
晦後每賅吏脫免復圭按籍役之歷知滄州臨事

敏決稱健吏

新通志  
引宋史

曾鞏字子固致堯孫建昌人嘉祐二年登進士第  
歷知齊襄洪福明亳滄州所至務去民疾苦入爲  
中書舍人文章與歐陽修齊名世稱南豐先生

前志

高賦字正臣中山人以父任爲右班殿直復舉進

士改奉禮部郎又加龍圖閣知滄州前知滄州程  
昉欲於境內開西流河繞州而北注三塘泊賦曰  
滄州近歲加隄防猶懼奔濫矧妄有開鑿乎昉執  
不從功竟無成

李南公知滄州蘇軾草詔云刺史秩六百石以按  
列郡而治行卓然乃以二千石爲郡守昔以責人  
今以自責則物被其惠民無閒言爾等皆常奉使  
督察官吏公明之稱達於朕聽董治江淮控臨河  
海任亦重矣益懋勉之無使風采減於平昔

何灌字仲諒祥符人武選登第爲河東從事徽宗

時累遷西上閣門使威州刺史知滄州以治城障

功轉引進使

案新通志諸使有何權亦祥符人而此名作璣意卽是一諫蓋源字之誤

靳宗說爲提舉監滄州鹽山縣務有繫囚坐殺人

法當死宗說疑之會犯者言其母九十病且甚願

得一別而死宗說惻然釋囚縛令人與俱至家旣

而更獲所殺人者

俱同上

孔遶孔子四十一代孫爲滄州乾符令卒贈兵部

員外郎

據前志補

金

大臭本名托卜嘉

原作撻不野

其先遼陽人天會中爲

河閒路都統己克河閒棟摩怒其不早降因縱軍

大掠臭諫止之己掠者官爲贖還

新通志  
引金史

梁肅字孟容奉聖州人天眷二年擢進士第攝大名少尹正隆末境內盜起驅百姓平人陷賊中不能自辨者數千人皆繫大名獄肅到官考驗得其情讞出者十八九大定初除河北東路轉運副使時幹罕亂後兵食不足詔肅措置沿邊兵食移牒肇州北京廣甯鹽場許民以米易鹽軍民皆得其利四年檢東平大名兩路戶籍物力稱其平允

張大節字信之代州五臺人擢天德三年進士第

世宗時爲橫海軍節度使郡境有巨盜久不獲大節以方畧擒之後河決於衛橫流而東滄境有九河故道大節卽相宜繕隄水不爲害章宗卽位擢中都路都轉運使因言河東賦重當減議者或不問大節以他路田賦質之遂命減焉

任天寵字清叔曹州定陶人貞祐初中都路轉運使時京師戒嚴糧運艱阻天寵悉力營辦曲盡勞瘁出家貲以濟飢者全活甚衆監察御史高夔劉元規舉天寵公勤明敏有才幹可安集百姓遷戶

部尚書

俱同上

高錫字永之遼陽人以蔭補官貞祐初累遷河北

東路按察轉運使城破遂自投城下而死

大清一統志

完顏佐本姓梁氏金宣宗命完顏敵住爲副以佐

爲都統成直沽寨貞祐二年元軍遣張暉等三人

來招佐佐執之翼日劉永昌率衆二十人持文書

來署其文曰天賜佐擲之麾下執永昌及暉等併

斬之帝嘉其功遷佐奉國上將軍賜姓完顏氏

前志

趙重福字履祥豐州人爲滄州鹽副使歲饑民煮

鹵爲鹽賣以給食鹽官往往杖殺之重福曰甯使

課殿不忍殺人比歲滿課殿當降尙書右丞完顏

匡三司使按春知其事乃以歲荒薄其罰大安三年治密雲貞祐二年以守密雲功遷同知河閒府事權清州防禦使攝河北東路兵馬都總管三年河閒被圍兵少多羸疾不任戰欲亡去重福勸其父老率其子弟強者戰弱者守會人兩圍乃解去

新通志

引金史

張甫賜姓完顏氏興定四年封高陽公以雄鄭等州靜海等縣隸焉元光二年甫復河閒府捷報達上上以道途梗塞報者艱虞命厚賞之以功進金

紫光祿大夫

靜海縣志 案此已見封建因縣祀名宦故錄於此

訛里也

一作額里頁

滄州同知海陵曰前日令內任官

六品以上外任官五品以上並舉所知未聞有舉之者豈無其才邪抑知而不舉邪魏子平曰請令當舉之官每任須舉一人滄州同知訛里也等五

人在舉中

據前志補

皮肅明昌四年爲南皮令練才潔守四境著聞十月壬子詔察舉廉吏尙書省奏稱提刑司所察十

人以肅爲第一

前志

元

高源河開路都轉運使撫治有條竈戶逃者皆復

業常賦外羨餘幾千萬緡前志

謝讓字仲和潁昌人世祖時爲河閒等路都轉運  
鹽司經歷先是竈戶在軍籍者悉除其名以丁多  
寡爲額輸鹽其後多僱舊戶代爲煮鹽而僱錢甚  
薄讓言軍戶旣落籍爲民當與舊竈戶均役旣令  
代役豈宜復薄其傭使重困乎自今僱人必厚值  
乃聽先是逃亡戶率令見戶包納其鹽由是豪強  
者以計免而貧弱愈困讓令驗物力多寡比次甲

乙以均之

新通志  
引元史

成遵字誼叔南陽穰縣人至正十一年以議河忤

丞相意出爲大都河閒等處都轉運鹽使初汝汴  
二郡多富商運司賴之是時汝甯盜起侵汴境朝  
廷調兵往討括船運糧以故舟楫不通商販遂絕  
遵隨事處宜國課皆集

德埒威蘇

原作迭里威失

伊吾廬人延祐四年爲河閒路

總管屬歲饑出俸金及官庫所積賑之活數十萬  
人河閒當水陸要衝四方供億皆取給焉德埒威  
蘇立法調遣民便之復建言增置便習弓馬尉一  
人益邏兵之數於是盜賊屏息陵州羣凶爲官民

害悉收繫死獄中

元史塔本傳  
俱同上

崔敬字伯恭大甯之惠州人至正十一年同知大都路總管府事直沽河淤數年中書省委敬浚治之給鈔數萬錠募工萬人不三月告成咸服其能

新通志

王思誠字致道兗州磁陽人至正時河閒路總管磁河水頻溢決真定境鐵燈千思誠集民作隄晝夜督工期月而塞民獲耕藝歲用大稔南皮民父祖嘗瀕御河種柳輸課於官後河決柳沒官猶徵之子孫貧不能償思誠連請於朝除之郡庭生嘉禾三本僚屬欲上進思誠曰吾嘗惡人行異政沽

美名乃止所轄景州廣川鎮漢董仲舒之里也河  
閒尊福鄉博士毛萇舊居也皆請建書院設山長

新通志

引元史

王君美懷來人至元五年爲南皮尹拯溺除厄澤

留永世

前志

忽辛涿州人至大三年爲南皮達魯花赤明達時  
務釐弊恤民興學造士

馬克昭至正中爲南皮尹立濬川碑以除水患德  
澤常存

宋訥滑縣人元季爲鹽山令值兵燹固爲城守民

恃以無恐洪武初授國子助教累陞祭酒祀名宦  
王欽禮字子敬幼穎悟甫就學精敏過人及冠倣  
儻剛果勇於爲善遊京師詹事院辟爲典設署書  
史轉雄州吏目州富南北要衝號爲繁劇卒以才  
識明敏服其同列調南皮尉盜聞入境設法掩捕  
會未半載盡獲之無遺類人稱其神獄訟淹久者  
亦來求決則以理開諭號爲平允遷鹽山尹頻海  
鹽筴事重遷者旁午而私鹽盜販出沒其間凶朋  
黠胥並緣爲奸利民甚厭苦之至是摘發奸欺防  
禁周密遂一切掃除失刺與民雜處素強暴嘗自

焚其廬以誣居民亟正其罪老幼咸戴至正十年  
宣授朝列大夫保定路總管

董搏霄磁州人從石蘭奚接益都大敗城下詔陞  
淮南樞密院副使兼山東宣慰使都元帥有嫉其  
功請以弟昂霄代領其眾未幾命搏霄守河閒之  
長蘆所至理冤獄革弊政嘗克復杭湖徽饒諸路  
斬獲無算尋駐兵南皮縣而毛貴兵奄至搏霄督  
兵力戰死事聞追封魏國公諡忠定

俱同上

明

汪應蛟字潛夫婺源人萬曆二年進士授南京兵

部主事累遷山西按察使治兵易州陳礦使王虎  
貪恣狀不報朝鮮再用兵移應蛟天津及天津巡  
撫萬世德經略朝鮮卽擢應蛟僉都御史代之屢  
上兵食事宜扼險列屯軍聲甚振朝鮮事甯移撫  
保定歲旱蝗賑恤甚力已極言畿民困敝請盡罷  
礦稅會奸人柳勝秋等妄言括畿輔稅可得銀十  
有三萬應蛟三疏力爭然僅得減半而已三十年  
春帝命停礦稅俄中止應蛟復力爭不納應蛟在  
天津見葛沽白塘諸田盡爲汙萊詢之土民咸言  
斥鹵不可耕應蛟念地無水則鹹有水則潤若營

作水田當必有利乃募民墾田五千畝爲水田者  
十之四畝收至四五石田利大興及移保定乃上  
疏曰天津屯兵四千費餉六萬俱斂諸民間留兵  
則民告病恤民則軍不給計惟屯田可以足食今  
荒土連封蒿萊彌望若開渠置堰規以爲田可七  
千頃頃得穀三百石近鎮年例可以兼資非獨天  
津之餉足取給也因條畫墾田丁夫及稅額多寡  
以請得旨允行己又請廣興水利略言臣境內諸  
川易水可以溉金臺滹水可以溉恆山滹水可以  
溉中山滹水可以溉襄國漳水來自鄴下西門豹

嘗用之瀛海當諸河下流視江南澤國不異其他  
山下之泉地中之水所在而有咸得引以溉田請  
通渠築防量發軍夫一準南方水田之法行之所  
部六府可得田數萬頃歲益穀千萬石畿民從此  
饒給無旱潦之患卽不幸漕河有梗亦可改折於  
南取糴於北帝報許後卒不能行召爲工部右侍

郎

新通志  
引明史

畢自嚴字景會山東淄川人進士天啟元年復設  
天津巡撫以僉都御史首任庶事草創晝夜經營  
招募水陸兵二萬人市馬千匹戰艦營房甲仗稱

是請於部者不過七萬有奇以三萬成軍計所贏且四萬餘籌畫軍資事贍而用約他人莫能及也孫承宗以閣部督師閱邊至津見將士精銳部伍整肅嘆曰使九邊盡若是何憂戎馬哉會山東妖賊起於鄒滕徵兵赴勦自嚴以天津道來斯行爲監軍協同參將劉永昌率五千人往討前軍已抵德州而武邑妖黨于弘志聚衆數千突起應之勢甚張自嚴急檄後軍守備董世賢移兵越戰俘斬四千餘鄒滕賊以援絕而敗事平晉戶部左侍郎陞督餉部院尋以李邦華代巡撫事邦華內陞津

撫事以自嚴兼之一時操兵餉兩柄前未有也

前志

李邦華字孟闓吉水人舉萬曆三十一年鄉試明

年成進士天啟初以右僉都御史巡撫天津軍府

新立庶務草創邦華至極力振飭津門軍遂爲諸

鎮冠進兵部右侍郎

新通志  
引明史

李繼貞字徵尹太倉州人萬曆四十一年進士崇

禎十二年起拜兵部右侍郎兼右僉都御史巡撫

天津督薊遼軍餉乃大興屯田列上經地招佃用

水任人薄賦五議白塘葛沽數十里閒田大熟十

四年詔發水師援遼坐戰艦不具除名

同繼貞巡

天津時畿輔被兵薊遼軍餉六月猶未開運繼貞  
至悉心籌畫八月而運畢城中無井率取水城外  
繼貞特穿水門引流入之軍民稱便銳意興屯田  
躬巡相視白塘葛沽數十里閒黍禾彌望及罷歸  
以所節省及俸薪七千金貯之官庫民留之不得

羣爲建祠

又大清一統志

陳泰字吉亨光澤人宣德丁未會試乙榜景泰改  
元擢大理寺右少卿守備白洋口轉右僉都御史  
鎮守易州節制紫荆倒馬等關泰早夜究心畫計  
忘其勞虜知有備遂遁去及考察大名廣平順德

河閒諸府衛官吏去留咸當人心既而三上章辭位不聽益勵勤以圖報稱新通志引分省人物考三年兼巡

撫保定六府

又明史本傳

楊璿字叔璣晉陵人成化閒以都御史巡撫北直

時河閒水災屬邑告竭處置得宜全活甚眾

鹽山縣志

張瑩

明史張悅傳作瑩

字廷器華亭人正統戊辰進士景

泰元年擢監察御史北虜內寇承勅往北畿清理

馬政密雲諂言有不軌者受密命往察且撫定之

出按宣府有都御史子犯法乃按其罪并劾其父

罷之以宣府將佐多冗請分守獨石諸邊歸總諸

道成化七年丁憂十年起原職巡撫保定等府值

久旱給民牛種俾不廢業

新通志引分省人物考

侶鍾字大器鄆城人成化二年進士累遷右副都

御史巡撫保定諸府河閒瀕海民地爲勢家所據

鍾奪還之民召爲刑部右侍郎

新通志引明史

鍾巡撫保

定卻守關者餽金河閒瀕海淤地舊爲豪家所種

占者悉奪還之民

又引分省人物考

張鼎字大器咸甯人成化二年進士都察院右僉

都御史巡撫保定至則令各府沿路築牆以禦盜

賊衝突至今旅人賴之爲永利焉

史琳字天瑞餘姚人成化丙戌進士宏治閒以都御史巡撫保定諸府兼提督紫荆諸關畿甸民困重役戍卒疲於罰班又滹沱漲溢壞民田廬時爲三患乃爲定徭役法奏免重稅并河上流穿支渠以殺水怒民賴以蘇眞定大名諸府果園皆居民世業嬖倖怙寵奏取以備供應琳力言其不可辭甚懇至遣官覆視果如其言乃止久之有議增眞定保定借薪夫役者疏諍尤力詔仍其舊

高銓字宗選江都人成化己丑進士宏治丙辰以御史巡撫保定諸府定徭役修要害有妄指民田

獻爲皇莊者命侍郎二人會勘民冤聲撼野至毆  
州縣吏不得行衆頗縱之欲藉以塞命銓曰若是  
則民重得罪請勘實以聞主上仁明當不忍奪民  
利以徇左右已而果然

張縉字朝用陽曲人成化己丑登甲科知滄州州  
居南北之衝且頻病雨潦多方賑救民賴之安權  
貴欲請境內地爲莊田縉不可事乃寢宏治庚申  
八月擢右僉都御史巡撫保定等府飭土馬以防  
寇掠有發輒得寇幾絕嘗疏陳八事皆切民病辛  
酉四月進右副都御史巡撫宣府虜入屢有斬獲

之功十一月改督漕運

王沂字希會武進人成化十一年進士宏治十四年以御史巡撫真定等府兼提督紫荆三關時賦役繁重力爲裁省滹沱河水溢壞民田廬奏請築隄捍之功成賜綺幣獎勞

俱同上

王璟字廷采沂人成化八年進士拜御史宏治十七年冬巡撫保定武宗立太監夏綬乞於真定諸府歲加葺場稅少監傅琢請履畝覈靜海永清隆平諸縣田太監張峻欲稅甯晉小河往來客貨詔皆許之又以莊田故遣緹騎逮民魯堂等二百餘

人畿內騷動璟抗疏切諫尙書韓文等力持之管

莊內臣稍得召還正德元年四月引疾致仕

新通志引

明史璟以御史按視山海等關保定諸郡旌別臧否

罷行利弊改巡撫保定路陳地方事宜並乞罷皇

莊名目以蘇民困孝宗嘉納之時中官奉命勘甯

晉新河諸縣土田吏稍侵侮遂奏遣官校捕捉鄉

民二百餘家遠近驚擾璟備疏其害謂宜斥罷諸

璫田土盡歸小民人皆壯之

又引分省人物考

張瀉字宗厚合肥人成化丙午薦於鄉明年登進

士孝宗時巡撫保定兼提督紫荆關是時傳報邊

警濱經略邊務悉心區畫虜遁去河閒諸郡告饑  
奉勅賑濟全活者以萬計

孟鳳卽孟臧

案職官表作卽臧鳳較是

字瑞周曲阜人宏治庚

戌進士以御史出按宣大時北鄙多警肅慮貞度  
以撫戎備虜聞之不敢侵軼擢巡撫保定右副都  
御史巡撫順天等府嚴察舉飭兵戎罷庸懦畿徼  
以甯世宗承統復提督宣大三關等處軍務至則  
選將領作士氣明賞罰謹烽堠虜懼弗入

林廷玉字粹夫平涼人成化閒進士正德初以都  
御史巡撫保定等府兼提督紫荆等關勢宦貴戚

相率斂戢又嚴捕巡軍之奸以杜響馬巢穴奏劾  
守備倒馬關太監李貴及都指揮張太僕丞之惡  
尋致仕去

伍符字朝信安福人成化丁未進士直隸巡撫甫  
持節會武皇南巡細鉅畢辦上嘉悅武將劉暉宦  
官張忠併以寵幸前驅竊弄威福正色與抗卒莫  
之逞畿輔要衝王師絡繹民心懍懍多方鎮定六  
郡三關宴然安堵駕旋僅拜銀牌之賜不阿左右

故也

俱同上

劉麟字元瑞南京廣洋衛人宏治九年進士嘉靖

初以右副都御史巡撫保定六府中官耿忠守備  
紫荆多縱麟劾奏之請捐天津三衛屯田課及出  
庫儲給河南三衛軍月餉徵逋課以償皆報可尋

引疾歸

新通志  
引明史

林廷楫字利瞻閩縣人宏治己未進士嘉靖初以

都察院右副都御史巡撫保定等府

明史林瀚傳  
廷楫嘉靖初

丁父憂服闋起官江西湖  
廣擢御史巡撫保定等府

蒞政卽疏革抽分內臣

清查驛傳泛濫議處軍民數事已罷歸

新通志引  
分省人物

考

王應鵬字天宇鄞縣人正德戊辰進士督學畿內

嘗語諸生曰國初氣化渾厚士有實學故發爲文章者論事析理足裨世教近來文體衰薄動以古書字句相摹擬求其中則索然無有不惟文不成體學不成章往往居官任職乖則僨事皆學術之禍也士服其教文治一新擢大理少卿遷僉都御史巡撫畿甸整飭邊備上便宜數千言劇寇王朝相等取兵殲滅之事聞賜白金文綺

許宗魯字東侯咸甯人正德丁丑進士授御史嘉靖壬辰僉都御史巡撫保定正定以近畿民苦甚乃嚴覈驛傳又定府州縣徭賦等式癸巳以築堤

捍滹沱河有功上特賜璽書銀幣旌焉時南給事有與之隙者論罷歸庚戌會虜警召復都御史駐

昌平

俱同上

周金字子庚武進人正德三年進士嘉靖元年以御史撫宣府宣府總督侍郎馮清苛刻諸軍請糧不從且欲鞭之衆轟然圍清府署金方病出坐院門召諸軍官數之曰是若輩剝削之過欲痛鞭之軍士氣稍平擁而前請曰總制不恤我耳金從容諭以利害衆乃解散去得無變改撫保定巡按御史李新芳疑廣平知縣謀已欲扶之知府爲之解

並欲執知府發兵二千捕之知府及佐貳皆走一  
城盡空金發其罪狀卒下刑部黜官金遷兵部右

侍郎

新通志  
引明史

劉夔字舜弼襄垣人宏治辛丑進士世宗時改檢  
討謫判大名至郡折節親簿書事長吏惟謹長吏  
益賢之暇則葺元城書院進諸生闡經義興尙文  
教彬彬多成材焉乙未擢左僉都御史巡撫保定  
保定畿輔重地俗悍喜鬪歲薦饑民或聚爲盜至  
則按捕之節用愛人緩賦驅蝗民賴以安提督三  
關邊驚亘測飭兵食屯要害數親巡視慨然有勒

石燕然之志居三載虜不近塞輯甯保障之績民  
至今頌之又疏治運河葺修嶽祠稱旨數膺聖書  
褒美賜賚加渥方駸駸嚮用乃爲言官誣論遂懇

疏乞歸

新通志引分  
省人物考

吳瀚字受夫洛陽人由進士累遷右副都御史巡  
撫畿甸兼督三關值邊疆多壘遣戍靡常乃廣積  
貯修器械簡士馬嚴校閱而月而戰守之具各備  
又以馬水口李家嶺爲宣大要衝乃剗壁築垣增  
屯置戍備戒孔嚴後虜果至浮圖峪不得入議者  
以二堡經略爲有功焉

蘇祐字允吉濮州人嘉靖丙戌進士授縣令補東鹿邑多繫囚下車一日罷釋數十百人民有昵妾殺妻沈之井而逸者吏弗問也是日捕置之法明日革罷徭車三十兩又明日有詔召東鹿人語曰

三日官府百年父母拜御史按宣大乙巳拜僉都

御史巡撫保定總督宣大山西軍務俱同上

楊守謙字允亨徐州人人物考作長沙人嘉靖八年進士

二十九年以副都御史巡撫保定兼督紫荆諸關

去鎮之日傾城號泣有追送數百里外者新通志引明史

吳嶽字汝喬汶上人嘉靖十一年進士授戶部主

事歷郎中出知廬州府改保定治如廬州法遷右  
僉都御史巡撫保定六府奏裁徵發冗費十六七  
民力遂寬甫浹歲引疾去

同上

宋纁字伯敬商邱人嘉靖三十八年進士隆慶改  
元擢順天府丞尋以右僉都御史巡撫保定諸府  
核缺伍汰冗兵罷諸道援兵防禦省餉無算萬曆  
初與張居正不合引疾歸居正卒廷臣交薦以故  
官撫保定獲鹿諸縣饑先賑後以聞帝以近畿宜  
候命令災重及地遠者便宜振貸餘俱奏聞尋遷  
南東戶部右侍郎召還部進左改督倉場請減額

解贖銀民壯弓兵諸役已裁者勿徵民間工食十

四年遷戶部尙書

新通志  
引明史

萬曆二年奏除慶雲餘

地銀五百三十兩六錢四分縣民永賴焉

慶雲  
縣志

孫丕揚字叔孝富平人嘉靖三十五年進士萬曆

元年擢右僉都御史巡撫保定諸府以嚴爲治屬

吏皆惴惴按行關隘增置敵樓三百餘所築邊牆

萬餘文錄功進右副都御史

新通志  
引明史

張鹵字召和儀封人嘉靖己未進士萬曆閒以都

御史巡撫保定修三關險阨數百里保障功爲多

大瑞馮保乞爲建坊不許以爲勞百姓力媚士大

夫尚不可况內璫乎保目攝之而未發也江陵以材望相推每與談膝輒前席既別與之約事可否具以書相聞鹵益自發舒引當否無所詘有所薦進及論刺皆獨行其意不阿相君自久之漸不能平喉言官論之左遷南京太常寺卿乞休歸

新通志引

分省人物考

案上三任可知職官任年不確亦未敢遽據以改之因不得此原書詳核也

辛自修字子吉襄城人嘉靖三十五年進士萬厯閒以右僉都御史巡撫保定六府奏減均徭里甲銀六萬兩增築雄任邱二縣隄以禦滹沱水患每歲防秋巡撫移駐易州徵所部供費防秋已罷徵

皇化三卷元一  
卷二十九  
臣續  
三

如故自修奏已之

新通志  
引明史

陰武卿字定夫內江人嘉靖丙辰進士萬曆壬午以太常卿巡撫保定勦平劇盜行劫鉅鹿新河閒者又以清丈田糧議處賑恤清理河道湮塞申飭三關墩堡處欽蒙敘錄賞資甚多而權璫之籍沒嚴覈惡黨馮保等財產無敢一有寄匿者

新通志  
引分省

人物  
考

賈三近字德修岷縣人隆慶戊辰進士萬曆閒以右僉都御史巡撫保定西輔大饑民多死徙疏請停罷徭租大發倉庾量日賑貸設廠千餘區賦粟

煮糜粥日食男婦二十二萬口他省流民多出其境別具食道上待之西輔之民賴以全活家室咸爲位祝焉以親老乞病歸

同上

三近以萬曆十二年

巡撫保定畿輔大饑賑貸有方

又引明史

劉東星字子明沁水人隆慶戊辰進士改庶吉士授兵科給事中萬曆二十年擢右僉都御史巡撫保定時朝鮮以倭難告王師調集悉會天津而天津靜海滄州河閒皆被災東星請漕米十萬石平糶民乃濟

新通志引明史

博陵盜起聚且千人吏請發兵

勦捕東星曰此潢池弄兵可尺檄下耳殲其魁若

千餘貫不問乃解散

又引分省人物考

孫瑋字純玉渭南人萬曆五年進士三十年以右副都御史巡撫保定朝鮮用兵置軍天津月餉六萬悉派之民間先任巡撫汪應蛟役軍大治水田以所入充餉瑋踵行之田益墾遂免加派歲比不登旱蝗大水相繼瑋多方賑救帝亦時出內帑佐之所條荒政率報允畿輔礦使倍他省礦已竭而搜鑿不已至歲責民賠納瑋果疏陳其害且列天津稅使馬堂六大罪皆不省就進兵部侍郎召爲

右都御史督倉場

新通志引明史

徐標濟甯人崇禎十六年擢右僉都御史巡撫保定  
定陛見請重邊防嚴守令用軍戰禦敵招流民墾  
荒帝深嘉之李自成陷山西警日逼加標總督畿  
南山東河北軍務仍兼巡撫移駐正定以遏賊賊  
遣使諭降標毀檄戮其使中軍謝嘉福伺標登城

晝守禦策鼓衆殺之

新通志引  
清一統志

大

陳政字宣之番禺人景泰甲戌進士拜御史提督  
北直隸學校立教條十五事設簿書以稽學者勤  
惰隨其資質高下而成就之大都以德行爲本文

藝爲末未嘗輕易棄人故學者咸感其德

新通志  
引分省

人物考

左光斗桐城人萬曆丁未進士以御史出理京畿

屯田上三因十四議詔悉允行水利大興北人始

知藝稻改理學政執法衡文權貴不敢干以私涿

州置水田數百頃贍貧生並給八府鄉試卷永為

例又請開武學以教諸生射刻兼才錄與文並興

人競超距前志 案本傳與諸疏是先任屯田後

而中改也自前志有此誤會而又不列名

職官致新通志亦不列於督學今悉據補

于謙字廷益錢塘人宣德四年以御史巡視長蘆

鹽政捕馬船夾帶私鹽不避權貴悉置之法河道

爲之一清

舊通志 按明史  
本傳未載此事

涂禎新淦人宏治十二年進士正德初巡鹽長蘆  
劉瑾縱私人市鹽又命其黨畢眞託取海物侵奪  
商利禎皆據法裁之

新通志引明  
史周璽傳

于鏊字器之滁州人正德戊辰進士以御史督長  
蘆鹽法兼視河道所至剗弊剔蠹風裁自持時薊  
賊楊虎等大掠河間諸郡縣勢甚猖獗適駐滄州  
賊前驅猝至城下守吏遁去人情惶駭賊已登城  
鏊服朱衣坐臺中臺面城邇賊從城上望見相戒  
曰毋驚動欽差相率詣臺門乞命鏊諭以無留城

中及殺人劫庫自非首惡並許自新皆歡呼羅拜  
而去命數輩招降數百人巨凶就縛後按巡宣大  
監軍廝養誘脅大戶包納率至乾沒公私受蠹廉  
知之掩捕十數人治其罪勒限令償上下肅然莫

敢犯踰年代還

新通志引分  
省人物考

徐讚字朝儀永康人宏治乙丑進士授棗強縣知  
縣劇賊劉六等流劫郡邑讚繕兵城守先事爲備  
賊聞不敢犯民飢捐俸募粟作糜食之富人義激  
爭先發廩所全活以萬計陞山西道監察御史理  
鹽長蘆兼巡河道逆瑾餘黨楊虎等流劫開濟間

熾甚讚以計擒之送京師

裴紳字子書蒲州人嘉靖戊戌進士擢御史督理長蘆鹽政近京多奸民憑依城社私販大行首擒鄭尙書僕置之法乙巳按眞定是時虜連寇大原議增紫荆諸關埤塹事竣有白金文綺之賜

趙鏜字仲聲浙之江山人嘉靖丁未進士授御史督長蘆鹺政時軍興需鹽課甚急鏜悉力經理尋究弊源逾月條上封事皆中肯綮丙辰擢順天府丞時方缺尹諸務蝟集鏜以臺臣夙望飭典法繩之大府帖然無敢闌出入者

蘇士潤字惟德晉江人嘉靖戊午舉省試又七年  
成進士監察御史按長蘆漕政行小票法通商利  
民至今著爲令巡按順天首劾一州牧恃輿援乾  
沒官帑者貪墨吏聞而股栗中貴人義子憑城社  
張車騎橫行都中潤廉得其黨與盡置之法不少  
貸自是中貴斂手相戒

俱同上

馮從吾字仲好長安人萬曆十七年進士巡長蘆  
鹽政潔己惠商奸宄斂迹既還朝適帝以軍政大

黜兩京言官從吾亦削籍

新通志  
引明史

解延年棲霞人天順閒進士由戶部員外郎督三

衛軍儲捐俸建衛學士民德之

新通志引  
陝西志

張鍵字君重石州人正德丁卯薦於鄉明年舉進士拜戶部主事督儲天津值流賊奄至勢甚猖獗兵備副使陳天祥提兵禦之鍵爲居守登城誓衆晝夜不息卒保無虞薊州莊田屢經奏贖有司弗能決衛命往勘躬履疆畝一一爲精覈歸其侵於

民權勢斂迹

新通志引分  
省人物考

李璵字廷瑞祥符人景泰甲戌進士擢長蘆鹽運使抵任嚴立條格分毫無所取致仕還篋無長物惟故人某贈赤壁圖一幅而已

童瑞字世奇嘉定人宏治乙酉鄉薦第進士長蘆

鹽運使興修鹽利繩治豪猾尋改廣西參政

俱同上

徐問字用中武進人宏治進士正德時官長蘆鹽

運使運司故利藪自好者不樂居問曰吾欲清是

官也終任不取一錢累遷廣東布政使

新通志  
引明史

楊璉字廷佩原武人宏治庚戌進士正德庚午官

長蘆都轉鹽運司運使署設滄州近京師商旅多

豪右然鹽場有遠邇美惡凡場置一籌納竹筩中

令各商以次出之豪右不便曰吾革弊耳權貴何

恤由是鹽法大行壬申劇賊劉六等攻滄州急州

吏失守督州民登城守之且伺閒發礮石以斃賊首賊乃解去是年冬滄州內變殺吏民劫倉庫倉卒率士民力破之先是有馬指揮者與之善出白金二錠寄焉變後袍笏罄然惟馬金投破篋中獨完左右欲私之叱曰是何言安可作此喪吾所守

新通志引分

省人物考

東漢字希節華州人宏治戊午中鄉試嘉靖戊子遷長蘆鹽運司運使一年釐弊通商人人戴之爲

勒石頌德

同上

何繼高山陰人字汝登號泰甯由進士萬曆二十

二年任長蘆鹽運使疏壅滯禁私販謹出納轉輸不匱商竈視如父母時議修滄城經費無出高力爲籌畫得四萬金賴蕙事值歲大饑力捐二千金爲商民倡賑全活無算創建天門書院爲籌厯久之費擢山西參政去後三十年滄人謳思不置崇禎二年公請入名宦祠得旨允行又爲建專祠有

碑

滄州志稿

劉福重慶人成化己丑進士以山東按察副使備兵天津營造衛城有能名

前志

施榮黃巖人進士性寬厚險夷一致有激其怒以

試之者累不爲動正德初逆瑾構煽坐以事罰米千石道過河閒吏民憐其貧爭爲輸納乃得釋弘治中陞天津副使

陳天祥字元吉吳江縣人蒞天津道任未幾流寇倡亂民多塗炭公備禦有方一鎮賴以全活

史鑑字明古江南蘇州府人進士任天津道剖決如流庭無滯訟親任案牘之勞而吏不能欺下無催科之擾而民安其業以不能諂事上官遂奪職去軍民千餘人涕泣號呼不捨

俱同上

張羽字伯翔南鄭人宏治乙丑進士正德中守廣

平朱甯誣奏下獄吏民爭斂錢賄甯爲羽求解曰  
吾甯失官不敢失志若等愛吾幸無枉吾志也大  
理直其誣乃還郡自後民益相信斷獄大省爲八  
郡最會調守河閒士民泣送之擁輿不能行去之  
日民有遺思懸像而尸祝之者河閒郡中無賴數  
十恃豪橫鄉曲召地方當甲者謂曰若爲甲不緝  
捕奸俠顧令橫苦小民守姑貸若罪其密報以來  
於是武斷之豪悉斂迹改行郡中以清尼寺數十  
濁亂民俗乃廢其寺歸少尼於民之無家者卽其  
地立社學教郡中子弟又收恤殘孤於養濟院武

宗南狩有司供帳負緣爲奸卒陽散官錢陰斂富

室惟河閒據郡中錢治具軍民不擾供帳以辦河

閒廣平京師股肱郡素稱浩壤難治聲名藉甚新通

志引分省人物考以御史任天津副使天性至孝在官每

語及父母之教恆哽咽不能語敷政優裕吏民胥

服建立書院作養人才排斥異端敦厚民俗政尙

簡易有循良之風歷陞侍郎前志

胡文璧耒陽人宏治十二年進士正德初以御史

爲天津副使中官張忠督直沽皇莊縱羣小牟利

文璧捕治之爲所構械繫詔獄謫延安府照磨新通

志引明史  
張文明傳

邵相澤州人舉人天津副使仁明清慎吏畏民懷

修刻郡志垂憲永久開通澹水利廣害消歷陞貴

州布政

前志 案爾時軍衛  
何謂郡志失辭可異

呂盛建平人正德己未進士授義烏令歷遷山東

副使兵備天津武宗南巡適當孔道且時方饑僅

百計支吾復出無礙官銀日給流徙之民俾之就

食給醫藥以療時疾改雲南參政

新通志引分  
省人物考

錢如京字公溥桐城人宏治閒進士監察御史巡

按畿內所至有真御史名清河蓮花池鹵地數千

頃爲貴戚所據歲徵一萬七千餘兩民不堪命京  
以奏下悉請歸諸民民德之立祠祀焉陞副使兵  
備天津時武宗南巡經費不擾時論躉之同上

牛天麟聊城縣人進士嘉靖二年任天津道廉能  
勤敏吏畏民懷興學校裁冗費期年而政績大成

累陞大理寺卿

前志

葛木字仁夫上虞縣人進士嘉靖九年任天津副  
使河決朱家墳口險急難塞壞民田廬阻滯運道  
木載鐵鍋於船實土沈之始得鞏固至今無患同上

王璣字在叔衢州府西安人嘉靖己丑進士外補

僉憲轉副使兵備天津沿河皆屯所無司庾者奸人時駕小艇名假貿鹽實窺便攘竊覺而追之莫可指實乃籍其船戶官爲編類令船尾各畫一禽以相識別因得徑指船禽以赴訴盜無一得脫者

河道肅清

新通志引分省人物考

吳嘉會字惟禮代州人嘉靖甲午舉鄉試第一明年成進士丁未以憲副備兵天津庚戌虜闖入薊塞直薄都城薊守臣被逮卽日拜嘉會右僉都御史整飭薊鎮邊務七年虜匹馬不得入塞

劉廷臣字伯鄰洪洞人嘉靖戊戌進士庚戌擢辰

沅兵備副使改授天津嚴隄防明紀律拊瘡痍減  
供用久之山右妖民肆毒蔓延河閒大名之閒巡  
臺下捕治之令甚急意以驟勦之玉石俱焚給執  
令者曰此地皆我良民焉有妖賊速除捕治之令  
衆莫測陰呼謹密幹辦者授以方略賊因令弛撫  
解竟擒殺之地方以甯壬子遷右僉都御史巡撫  
宣府虜騎憑陵甚於諸鎮首請糧餉給其食亟修  
墩堡衛其居時復簡閱作其敵愾官軍俱戮力用  
命甲寅虜犯北路防禦有功晉右副都御史乙卯  
九月虜大舉入寇由西路奔懷來與賊對壘由是

不得南下夜遣勇士劫其營賊衆驚亂乃遁去乘  
勝追擊斬獲甚多捷聞天子嘉悅有白金文綺之  
賜上谷日行宣鎮地方曠遠難以周知乃編上谷  
須知上谷圖說南山圖考地理險夷兵馬強弱糧  
芻多寡無不備載邊事孔棘神力勞瘁初力疾視  
人不能勝乞歸

俱同上

毛愷天津副使字達和江山縣人進士所至咸著  
政聲及其蒞津也津屬五方襟處之地風俗不一  
民少惇樸利競魚鹽萬竈沿河而居日以戈矛弓  
矢爲事又中貴人皆所親屬遇有犯法輒齎金脫

之以故益難綏緝愷至以大振公道爲先不信私書爲本三年習俗大變於是築隄修堰以備災平價現值以集貨嚴捕索以靖萑苻稽屯田以安什伍汰冗弁以清煩擾明責任以雪冤誣於襍差則革之於妄費則裁之憫郵傳之勞則應付不苟恤疫癘之厄則埋掩維勤且自奉儉約布衣蔬食必以常祿歷陞吏部尙書

前志案祀  
府名宦祠

賴庭檜字爾舟晉江縣人進士萬曆七年任天津道增修學校振作人材易火甲爲房號併夫廠於驛遞民多便之陞四川參政

查志隆字鳴治海甯人萬曆十五年任天津道方  
路藩就封道經天津隆處置有方軍民不擾創建  
小學教民興行至今猶懷思之陞山東參政

彭國光字用卿德化人進士萬曆閒爲天津道廉  
潔明敏遇事有肩荷量裁驛遞整理海防尤稱有  
裨軍國

梁雲龍字會可瓊山縣人進士陞井陘兵備副使  
尋以防倭之役改天津任時饑饉頻仍兵食俱困  
雲龍焦勞籌策俾得戰守用裕遠近安之他若課  
文訓武救荒賑貧一時美政尤不能殫述歷陞湖

廣副都御史

俱同上

邱民仰字長白渭南人萬厯中舉於鄉以教諭遷順天東安知縣釐宿弊十二事河齧歲旱蝗爲文祭禱河他徙蝗亦盡調繁保定之新城崇禎二年縣被兵晨夕登陴守四方勤王兵畢出其地民仰調度有方民不知擾擢御史遭妻喪告歸出爲河閒知府遷天津副使又承平參政民仰善理劇以故所移皆要地十三年擢右僉都御史

新通志引明史

崔衍承樂初知河閒府幹濟有方善政著聞居民

樂業召爲刑部右侍郎

新通志引明一統志

山東膠州人承

樂元年任靜海縣勅建儒學監司廉其能遷河間

府知府勅修府治府學幹濟有方政績著聞

靜海縣志

李濬襄垣人永樂進士拜兵部主事陞保定知府

尋調河間所至有善政休歸鄉里

新通志引分省人物考

許侃正統初爲河間府爲政知大體惠及小民修

舉廢墜歷有成績

新通志引明一統志

廖謨泰和人正統中爲河間府同知潔已愛民弭

盜息訟民大悅後知府缺民數千走闕下請卽用

謨帝嘉許之政績益懋吏民戴之無閒言

新通志引大

清一統志

顧佐字良弼臨淮人登成化乙丑進士十九年以

刑部郎中出知河閒府

明史韓文傳佐以刑部主事歷郎中出爲河閒知府

貴戚莊田碁峙境內聞佐至不敢乘勢輻輳親校

冊籍吏無所容其奸驛司給供應令民計畝出錢

里中得免賄累郡有蓮瑞麥秀之謠

新通志引分省人物考

李讓鄆陵人天順中知河閒府野無游民庭無滯

訟請歸貧無資斧人相率出錢布以贖之一無所

受

新通志引舊通志

段釗澠池人宏治中知河閒時軍民儲時豪右久

擅其利而民常苦於輸納釗至悉按以法會計稱

平屬邑興濟縣爲昭聖皇太后故里勅使營兵供

億鉅萬釧綜理有要長貳忌能中傷之遂解任去

行橐蕭然時論稱屈

舊通志

喻茂堅正德閒知河閒府時畿內荒賑救所活萬

餘人

新通志引  
明一統志

丁以忠字崇義新建人由戊戌進士授刑部主事

出爲河閒知府發粟賑饑卻賄明法厯閩廣藩臬

所在尸祝

新通志引分  
省人物考

顏孕紹字賡明曲阜人崇禎四年進士厯知鳳陽

江都邯鄲遷真定同知守城勦寇有功十五年擢

河閒知府比歲大饑死亡載道寇盜充斥拊循甚  
至閏十一月

大清兵至與參議趙珽同知姚汝明知縣陳三接等  
堅守援兵雲集皆逗遛孕紹知城必破豫集一家  
老稚於室中積薪繞之而身往城上策戰守城破  
趨歸官舍舉火焚室衣冠北向再拜躍入火中同  
死珽字秉珪慈谿人崇禎元年進士河閒兵備僉  
事一門十四人悉被難汝明夏縣人天啟初舉於  
鄉崇禎閒授蠡縣後官河閒與妾任同死三接文  
水人舉崇禎六年鄉試知河閒縣歲旱饑人相食

三接至雨卽降有疑獄數年不決至卽決之是時

巷戰死珽贈太僕卿孕紹光祿卿汝明三接並僉

事

新通志引明史 按通鑿輯覽名允紹字廣明未詳孰是

常在榆社人宏治乙酉進士崇禎中知河間府值

歲凶荒悉心賑恤遠者遣官分給近者日哺以粥

又瘟疫大作普施藥餌全活甚多

新通志引山西志

盧觀象江西人選貢清軍同知陞後府經歷創學

田水田有功天津

前志

張星宣城人恩貢崇禎間任天津同知向來衛軍

家有餘丁雖幼稚亦按九則派役甚有身死名存

按籍徵發者軍不能支率多逃遁星下車惻然念之爲接保定衛例祇令一丁輸徭仍以徭役攤歸軍畝積困頓蘇孫承宗有記志之

同上

夏言華蓋殿大學士任工部主事時按臨青縣查勘草場民德之立生祠祀之在學宮西

前志以下青縣

以

王彬永樂初授青縣知縣以河決未及築隄禾稼盡沒痛不能救投水而死屍漂入縣甬道吏民憐之遂於隄上建祠名曰神隄

同上

王宏毅永樂初任以河決禾稼盡沒痛不能救投

水而死民于隄上立祠祀之名曰神隄

青縣志案合觀兩

文事同無疑惟人名異考前志職官明青縣知縣  
次任王彬注云永樂初任詳名宦卽指前條其與  
濟知縣四任王宏毅注云永樂十四年任河決以  
死殉云云又考青縣志青縣知縣次任卽前志之  
三任不閒王彬興濟知縣四任亦王宏毅注云永  
樂十四年任祀名宦云云則以死殉之爲王宏毅  
在青縣志固毫無可疑卽前志與濟下之注亦適  
爲青縣志作證且自承矛盾焉古蹟內神隄一條  
均引河閒府志而前志亦誤作王彬尤不解矣又  
前志縣志興濟十二任均是王彬且載其創建縣  
治儒學乾甯驛亦足見前志青縣之涉此致誤也  
因此考必兩傳並列始明故後於二邑諸賢令亦  
以世遞載不分

呂和興濟令專務以德化民俗爲之變陞南京禮

部主事祀名宦

前志

蘇峻東阿人政寬訟簡多所建置而役不及民卒

于官邑人追思之

縣志

劉素西平人青縣知縣興學勸農政務兼舉發奸  
摘伏吏民莫欺尋調河間縣降勅褒諭

前志

周忠大同衛人忠厚夙成政務寬簡振作士風愛  
民如子任青縣知縣未幾輒以憂去送者千餘人  
有泣下者

錢貫河南衛輝人宏治十二年知興濟事重修儒  
學及察院仁及小民不畏權勢天性儉約始終如  
一

劉釋邠州人任青縣知縣穎敏有精鑒剖斷如流

豪猾屏迹吏民畏服

李達榆林衛人正德十三年任興濟知縣重修儒學齋廡時河水泛漲隄岸將決興工修築寢食不遑卒至堅完民賴以安

俱同上

王緝顯泰州人文章典雅政事寬和每爲當道器獎後以誣降去任士民追悼

縣志

孟楠河南人釐奸剔弊愛民如子捐俸修學日進

士子親課文藝士風丕變衆建生祠以祀

同上

錢珍未詳何處人崇禎十一年城破死難

據縣志職官補

張文煥山東掖縣人崇禎閒知興濟縣事己卯城

破死難前  
志

余勁字憲明江西人青縣教諭學優行純獎拔士  
類宏治七年典雲貴文衡時稱得人未幾上春官  
以疾卒聞者哀悼入名宦縣志

李完字守卿德化人任青縣教諭學問博洽德行  
純全嘗以白鹿洞規教士時稱缺齋先生同上

張綸汶上人任青縣教諭公舉從祀有尋孔顏樂  
處得洙泗真傳義訂圖書採義皇之奧旨鼎新費  
序捐薄俸於青壇等語前志

張頌富順人舉人任青縣教諭邃於學安貧樂道

衣無重帛日惟蔬食處之裕如工於詩有文集傳

世同

馮琚任興濟教諭博學勤敏與諸生處惟尚道義

有四書詩經講義傳于世

縣志

尙樸永樂十三年任靜海縣新建奉新驛

前志

以下靜海縣

劉弁宣德九年任靜海縣重修縣治片言折獄一

介不取案無留牘至今稱之

劉照四川平利人舉人成化十九年任靜海縣政

尙愷悌事務詳明抑權貴禳蝗蝻重修學廟廣積

糧儲有去思碑

武雷山東館陶人正德十六年任靜海縣服強暴恤良善而清慎尤其所長

郭天錫山東福山人嘉靖三年任靜海縣剛直敏

達吏畏民懷

俱同上

陳範陝西蘭州人嘉靖六年任慈愛愷悌德比珪

璋

縣志職官案  
縣祀名宦故補

戴大槐福建莆田人舉人萬曆二十九年任靜海

縣祀名宦

前志

吳應陽福建甌甯人舉人萬曆三十二年任靜海縣案無留贖政有權衡清靜不擾明察難欺

董養聰山東濟陽人拔貢萬曆四十年任靜海縣  
修隄捍水晝夜躬督以勞瘵殞於任民咸痛焉有  
去思碑

王良相濟陽人舉人天啟三年任靜海縣才猷明  
敏勤勸課而士類興文禁簽派而窮黎樂業案無  
留牘獄無冤民累陞大理寺評事

胡啟睿江南海州人拔貢任靜海縣立社課士剔  
弊釐奸舊有遞馬私派銀兩申請革之士民咸感  
商賓河南洛陽人任靜海縣教論文行俱優陞吏  
科給事中

隨正脈山東高唐州人任靜海縣教諭捐俸濟貧  
勤課諸士

樊効才順天文安人拔貢萬厯閒任靜海教諭改  
修文廟訓諸生肄業科甲不絕士子尸祝之俱同上

江英四川江津人永樂七年知滄州果斷有守升  
貴州布政使參政州志職官注以下滄州

李伯震廣東德慶人永樂九年同知滄州新通志原注舊

志並誤作知州據州官題名碑改剛而能廉優於  
案州志自作知州且同知無此

爲政升光祿寺丞

劉謹山東濟甯人宣德元年知滄州公明寬恤秩

滿擢河閒府同知仍知州事六年增修文廟學宮  
上官儀福建沙縣進士知滄州修學造士勸農有

法俱同

上

賈忠山西崞縣人天順二年知滄州屬大水之後  
救荒弭盜百廢具舉州舊無城忠始修築民不知

役

州志  
稿

武英順天舉人成化閒知滄州不事煩苛興利除  
害葺城池摧強暴秩滿滄民赴闕保留加四品服

色仍領州事

前志

馬魁山東禹城人宏治十七年任知州興學校屏

浮重節義修城池深得民心以母老去百姓遮道  
泣留

張奇河南光州舉人正德年知滄州盜賊縱橫以  
修繕城池爲急務暇則操練兵馬未幾劉六等四  
面攻圍奇竭力保守賊宵遁百姓得安加四品官

仍管州事

俱同上

邵紀山西高平人正德十一年知滄州慈祥平易  
居五載升河南汝甯府同知百姓涕泣送別

州志職官

胡政湖廣松滋舉人知滄州莅政不煩待士有體  
修造文廟祭器一遵古式擢烏撒府同知

張興行山西絳州舉人萬曆十年知滄州在官六年多所振刷清查田畝民深德之

盧廷選福建莆田進士萬曆二十二年知滄州約己奉公平徭簡賦修舉廢墜摧抑豪強擢工部郎

中俱同上

王堯封金壇人進士雄才大節屢蹟屢壯由部郎外補南昌刺史萬曆二十七年量移滄州下車鎮定訛言請粟賑給修學校繕祠壇均富憐貧鋤強濟弱作興士類後爲忌者所中左遷兗州別駕前志

王三錫翼城人舉人萬曆三十四年任稟姿儉素

雅意慈祥嚴稗兌平市肆利無不興害無不翦瓜

期未及陞慶陽同知士民叩關泣留卒不能挽上同

李騰蛟河南武安舉人萬曆三十八年知滄州潔

己愛民廉介不苟在官九年州民被澤最久升真

定府同知

州志  
職官

蔡秉元金壇舉人天啟二年知滄州興學育材士

多成就刻有瀛海課士錄

朱萬年湖廣黃岡人由舉人萬曆二十五年任學

正培養士氣勤於督課酉戌鄉會試彬彬稱盛學

使歲試諸生優賞倍額無一劣黜者檄校天門書

院二十八年丁外艱去後陟國子博士

俱同上

張通永樂二年知南皮縣事招撫流移修整廟學

士民德之

前志以下南皮縣

張麟宣德元年知南皮才猷敏練視邑如家修公廨建城隍廟歷有功績

陳毅東莞人舉人宣德八年知南皮縣事清正慈明興學均賦眾愛戴之

于珥字文瑞嘉興人進士成化中知南皮縣事履謙持厚百廢具興調吳橋縣終慶遠知府

鄧翰字希召內江人進士宏治十五年任南皮慈

惠公明吏畏民懷及調滑縣百姓攀留百餘里祀  
名宦祠

李珙字敬之濟源舉人正德六年任南皮才幹精  
明操持嚴毅事關民社以身任之時畿內流寇勢  
張近城悉陷邑圍三日珙悉力捍禦已而射中渠  
魁遂遁去父老云正德中人思亂賊所至皆有內  
應故攻無不破珙洞燭其奸預拘無籍輩假他事  
以收禁之無復爲之地者城賴以全祀名宦

案新  
通志

珙作瑾本  
舊通志

朱方浙江永康人進士嘉靖元年知南皮縣事慈

祥愷悌雅重文學士民咸愛慕焉累官布政使泊頭留詩曰百餘日子南皮治何事一麾淮右行絲  
值亂餘纔得緒桃方種就未看成分符入手憐驅  
迫垂白盈途愧送迎無計相留強相與泊頭一見  
會頻仍

黃持衡字小素番禺舉人嘉靖二十五年任南皮  
平易不苛事治政舉

李筵號西楚湯陰舉人嘉靖三十二年任南皮剛  
明有爲清操無染擢戶部主事終知府重過百姓  
相送有詩曰當年撫字愧無成今日重來父老迎

風物不殊憐舊景桑田那忍問新耕春波渺渺停  
征棹隄柳依依繫別情喜有河陽賢令主肯教渤  
海擅前聲

馮鞞號南津武進舉人嘉靖四十一年任南皮疆  
項不阿軫恤獨切事關利害每身任之後以昭雪  
盆冤忤上官意竟掛彈章去之日百姓號涕攀卧  
軹不得發

龐沱字潤齋臨漳舉人萬厯二年知南皮縣事遇  
事敢爲風裁懋著雅負知人鑒後進多所識拔陞  
大名通判著詩集行世咏暮春詩曰三月正當三

十日古人惟解惜花枝不如放取殘春去便是南薰阜物時

王允中號愛溪祥符舉人萬曆八年任南皮才本諳練佐以精明爲一時循良之冠邑最苦田賦不均乃嚴核冒免加倍寄莊均徭頓減當丈地時委任老成者尺較寸度毫無隱漏勒石記焉目睹荒蕪捐俸買犢散給下戶田盡墾而牛更有生息眞父母斯民者遷部郎終參政

劉廷臣號梅谷瓊山舉人萬曆十九年任南皮平易近民無競於物乃厄於水共惜之建祠祀焉

李正華號文沙上高舉人萬曆二十二年任南皮  
忠信明而出之以豈弟有古循吏風甫下車卽燭  
猾胥奸竈嚴譴示警衆咋舌不敢犯邑苦丁差煩  
重編審時創爲九則通融之法使豪右不得影射  
而小民賴以蘇息鄰封聞之願借爲式連值歲饑  
捐俸賑濟存活甚衆喜造士督課無閒寒暑城衙  
廟祠悉再造而鼎新之會遷別駕士民詣闕保留  
准加本府銜視事任九載如一日百廢俱興祀名  
宦俱同字文河江西上高縣人河閒府通判帶管  
南皮縣事萬曆二十八年奉委審編革弊便民闔

邑爲立生祠並祀名宦

鹽山縣志

左之頑號署樓萊陽貢士萬曆三十五年知南皮

縣事兩遇河決跋涉疏淪飢溺不啻由己省刑薄

罰雅意文教陞徽州知府

前志

魏良佐號育明江陵舉人萬曆四十四年任南皮

廉潔沈靜政自己出渾厚中不乏精明不阿上官

意初若不愜者及廉知其介狀反重之喜談藝課

士吟嘯揮灑墨妙一時蓋理學宗工非特才吏也

仕終僉憲

佟卜年號觀瀾遼陽進士萬曆四十四年任南皮

值蝗旱後飢民嗷嗷乃建粥場十餘所躬詣驗散  
老幼均沾朝夕奔馳不憚勞瘁知府柯景曰公可  
謂貌瘦民肥矣恆加意民瘼清鹽課省冗費境內  
賴以充裕調河閒後遭誣陷百姓聞之莫不流涕  
祀名宦

王所須號幹字淄川舉人崇禎元年知南皮縣事  
起家勤儉治邑亦然明察綜覈無微不至而折節  
禮士撫恤貧民尤切切焉時徵調百端頃刻立辦  
應急需而弗擾閭邑安堵調交河終祀名宦

藍再茂號青初卽墨貢士崇禎三年知南皮縣事

案牘委積剖決如流其禁越訴練鄉勇修舉廢墜  
爲地方利益甚多以投劾去士民建去思祠仍祀  
名宦

簡仁瑞字季麟榮縣舉人崇禎七年任南皮饒幹  
濟才其繕城障治火器允足禦侮陞西安同知終  
知府祀名宦

陳虞裔耀州舉人崇禎十一年知南皮縣事忠實  
慈愛甫任三月遇變死難

滕善國昌樂人崇禎九年任南皮訓導忠義自矢

閩門全節

俱同上

高尚，仁河南人，永平府推官。嘉靖末，委查鹽山大施賑濟人沾實惠，以學宮圯壞，申允兩院委官修

整廟廡更新。

縣志以下鹽山縣

吳文靖，真定人。鹽山知縣。洪武九年任，移建縣治。

創修文廟，撫字有方，以丁艱去。民深思之。

前志

王憲，江西人。進士。洪武中任鹽山令，居官勤敏，奏

准鹽山慶雲煎鹽地方不堪屯田，祀名宦。

同上以進

士知鹽山縣。洪武初，署慶雲事，建議二縣皆瀕海

斥鹵地，不便屯田，民至今賴之。

慶雲縣志

張瑄，江西人。進士。以監察御史左遷鹽山令，恪於

奉公不開私蹊祀名宦

前志

林惟盛江西新建縣人舉人景泰七年任鹽山蒞

官仁明鼎新學宮陞太僕寺祀名宦

同上

武震河南淇縣舉人成化二年令鹽山始築邑城

重修廟學深知民瘼人皆德之

縣志

張綸宣城人由進士成化間令鹽山恩威兼濟政績著聞陞監察御史累官都察院右都御史祀名

宦

同上

時尙儒山東臨清州人舉人嘉靖五年任鹽山蒞政精敏有廉節增修社學崇尙文教邑舊無志尙

儒創修前  
志

岳孝先壽張縣人舉人嘉靖十六年任鹽山清廉  
方正優禮文學威制豪強有古循良風

李萼臨潼縣人舉人隆慶三年任鹽山明敏精勤  
百廢俱舉續修邑志徵校加詳陞兵馬司俱同上

劉子誠宜川人萬歷年授鹽山令開燕子口高家  
灣合古黃河以通海道人資其利舊通志祀名宦前志

陳誌字文書山東武定州拔貢任鹽山知縣有政  
績崇禎己卯兵破城誌初督眾守禦忽見城上火  
光燭天知城將陷乃謂夫人宋氏傅氏曰吾職在

守土城破義當死汝等早爲計遂朝服北面稽首  
自縊堂上二夫人亦自經死邑人感其忠節與櫬

送歸籍

舊通志

李有嘉福建莆田縣人宏治年任鹽山教諭  
訓課生徒雖伏臘未嘗撤講一時多所成就改遷

江西鉛山縣教諭

前志

盧綸洪洞縣人舉人宏治十六年任鹽山教諭學  
優行潔足爲坊表雖處奇窮晏如也生徒應致束

脩峻卻時服其廉祀名宦

案前志  
誤姓虞

薛廷熙福建福清縣人舉人隆慶二年任鹽山教

諭遜於經術公勤嚴正啟迪士類不辭寒暑陞贛

州府推官

俱同上

耿惟直字中庭山東霑化人歲貢由博興訓導陞  
鹽山教諭己卯城破亂兵挺刃入劫之索金帛惟  
直忿罵曰吾冷官安有此哉殺即殺耳死非所懼  
也捧印置堂中望闕再拜遂死之子爾復等皆遇

害

縣志案前志失名

祁鳳山西蒲州人舉人正統年任鹽山訓導博學  
強記動由矩度申明學規勸課惟勤一時人文丕

變陞南陽府教授

前志

王邦直字子魚山東卽墨人尉鹽山縣清節自持

一介不取請當道蘇養馬之累申荒蕪除包納之

糧裁缺歸里著有律呂正聲六十卷行世

縣志案職官

居縣丞之末據此云裁

缺則上文尉字誤耳

楊思義元末爲無棣令有惠政及民洪武元年歸

明更建縣治立廟學民爲立碑當羣雄角逐之時

能率衆歸正至今論開慶雲之治者必曰楊公也

縣志以下慶雲縣

趙亮兗州人慶雲典史廉勤幹濟聲播上下正統

十年大計天下羣吏始命舉治行卓異者亮在舉

中同被宴賚時人以爲榮擢知本縣尋遷崇仁知

縣

縣志

張彪磁州人成化二年任慶雲縣寬猛相濟大得民心奉例修城綜理有法不致苦民居官清慎任滿以老乞休貧不能歸遂占籍興濟家焉

前志

唐瓚首重廟學百廢俱興而政治民安爲當道禮重民到於今稱之

縣志

宋漢字天章膠州人成化年間知慶雲縣首新學廟朔望詣明倫堂爲諸生講析經義按丁定役貧富乃均辛丑饑勅遣賑貸漢分爲三等計口給放

夏不雨奏免夏稅秋傷稼奏免秋糧寇警上官檄  
諸邑發民兵會操漢言邑當衝要賊所出沒宜存

本境操肄以繫人心上官嘉之萑苻亦遂屏息

前志

文森字宗嚴常州府人宏治四年任慶雲縣下車  
問民疾苦遂緩徵出繫獄八十餘人歲旱不登再  
疏乞免田租畜馬不均上疏陳狀乃從其請著以  
爲令邑俗遇旱惡少羣聚斲棺發屍名打旱魃森  
嚴禁之祈雨禱烈日中應時而降邑蝗督民捕之  
瘞之於地民罔測檢災者至乃出蝗以示獨得免  
租毀淫祠興社學作士類旌節義一時民士翕然

改觀徵授監察御史

同上

杜玠字仲純滕縣人進士宏治十二年任慶雲縣清操自勵才識過人以德化民不事刑威遷南京

刑部主事陞郎中

縣志

李宋字承殷陳留人舉人知慶雲縣治事精敏新學宮增陴浚隍均徭平賦糾察隸胥民無科擾以惠政著聞六載遷秦州知州官至順天府治中去之日民多流涕送之

劉應兆郊城人舉人知慶雲縣三載百廢俱興政尚寬平捐置學田三十畝以惠貧士遷南京東城

兵馬司指揮縣民赴部乞留者數百人

俱同上

林之盛錢塘人萬曆二十八年任慶雲縣學優才

富剖決如流體恤民隱作養士類立社學按日爲

諸生剖析經義督課之

前志

葉時敦聞喜人萬曆三十年任慶雲縣潔己愛民

恩威並著人稱爲葉青天遇檢災見百姓貧苦流

涕曰田禾雖閒有可望纔十之一二耳若作半熟

何以辦秋徵竟以荒白得蠲民賴以活

同上

王之采字心一朝邑人萬曆二十九年進士

明史知

慶雲縣當九河下流歲有水患之采相度地勢集

民疏濬水不爲災民獲灌溉之利邑多荒地民不能耕爲買牛給無力者邑人立祠祀之

新通志引  
大清一

統志原注按明史之案除  
清苑知縣不載知慶雲事

李扶蘄州人崇禎七年任慶雲縣屬精勤政威德並行跋履川原修建橋梁民不病涉陞淮安府同

知前  
志

宣廷式慈容德度惠政清操至今頌之

縣志

王祚字振元朝邑人舉人知慶雲縣操守潔清氣度嚴峻聽訟據理順情而參之以法吏畏之如神明

明民戴之如父母

同上

齊秉鈞慶雲縣丞至正末任同縣尹楊思義率眾

附明建城修學宦力居多

前志

殷璞安慶舉人慶雲教諭有學識善誨人陞國子

監助教歷官荊州府通判所在人以碩德目之

縣志

祝繼元海甯歲貢慶雲教諭訓士有方嘗作步世

競辰二圖警諸生及時勤學置義田百五十畝積

粟公廩以贍單寒嘉靖二十年歲饑捐俸米二十

石士之貧者人給五斗以疾卒於官

李寶約嘉魚縣人舉人隆慶元年任教諭博學善

教擢行唐縣知縣

顏肅廬陵舉人慶雲訓導言論政事皆可師法陞  
祁門縣知縣

張綸臨朐人歲貢任訓導耿介有執不以私干有  
司陞陽穀縣教諭俱同上

商玫慶雲典史正德六年流賊攻城玫率眾拒之  
力戰而死妻子皆及於難邑人比之卞壺至今義  
之前志

殷尙質指揮僉事掌天津衛事有青天之號歷陞  
遼東總兵歿於陣諡忠勇同上

卷三十九終